

四庫全書

史部

欽定四庫全書

史部

續後漢書卷二十六至三十

詳校官編修臣黃壽齡

編修臣裴謙覆勘

騰錄貢生臣郭 墉

騰錄監生臣周謨揚

欽定四庫全書

續後漢書卷五十六

元 郝經 撰

列傳第二十三

魏

曹丕

文帝

謹案曹丕傳文全闕止存議贊

議曰高帝除秦苛虐蠲楚暴戾恢張雄圖鋪繹遠畧創業垂統文景共儉專務德化愛養滋殖與天下休息存武

拓大國勢孝宣綜核政理世祖中興勘定偽亂賓延儒

雅崇尚經術獎勵風節孝明孝章增賁潤色臨雍拜老

橫經問道

原注後漢書中元元年始建三雍明帝即位親行其禮天子始冠通天衣日月備法物之

駕盛清道之儀坐明堂而朝羣后登靈臺以望雲物袒割辟雍之上尊養三老五更饗射禮畢帝正坐自講諸儒執經問難於前冠帶搢紳之人圍橋門而觀聽者蓋億萬計

濟濟洋洋幾於三代漢

德於是極矣然其亂本亦始高帝不學無術用秦亂制

遂廢三代禮樂雖規模濶大而綱紀不正帷薄之間乃

有人彘母后外戚幾危劉氏

原注漢書呂后酖殺趙王如意遂斷戚夫人手足去

眼熏耳飲瘡藥使居鞠域中名曰人彘惠帝崩太后臨朝稱制復殺趙王友共王恢燕王建等立周呂侯子台為呂王台弟產為梁王建成侯釋之子祿為趙王又以祿為上將軍居北軍產為相國居南軍欲為亂大尉周勃等誅之孝武游宴後庭而官人始與政

原註後漢書孝武數宴後庭或潛遊

離館或請奏機事多以官人主之

於是三蠹為漢國疾

原註三蠹謂母后外戚官官也

呂霍上官終為王氏而恭顯遂殺鴻儒大臣

原註漢書弘恭石顯

皆坐法腐刑為中黃門宣帝時任中書官恭為令顯為僕射元帝即位諧殺前將軍蕭望之太中大夫張猛待詔賈捐之鄭令蘇建重足一迹至於東京稱制者公卿以下咸畏之

六后擅國者五族

原註後漢書臨朝者六后章帝竇太后和熹鄧太后安思閭太后順烈梁

太后桓思竇太后靈思何太后也五族竇憲閭顯梁冀竇武何進也孫程曹節侯覽張讓

廢立太子賊殺公卿禁錮名士皆三代所未有而甚於
亡秦漢之亂亦極矣德不復而亂日滋至於屍何進滅
宦官召董卓潰疣斷命而漢遂亡獻帝以枯朽餘燼流
漂而東為操所挾以為盜資焚夷殘滅二十餘年轉而
為魏陰界之不然而遺澤之所漸漬寬政之所覆冒仁
心之所維繫皇威之所披偃株跋連締未能卒斬故傑
將義士猶欲復漢於既亡雲從景附於遐孤遺曹是以

大統復集於昭烈皇帝丕特負賊胙篋之盜操死而直
取自為可也乃從容禪讓自以為舜禹復出其自欺也
甚矣且輕薄佻靡未除貴驕公子之習不矜細行隳敗
禮律踈薄骨肉自戕本根亂亡基兆已在於是孔明謂
為土龍芻狗宜哉

贊曰臣篡君廢父竊子奪驕淫矜夸熹姦賈惡斐斐諛
伎沾沾淺識露根無基甫得已失

欽定四庫全書

續後漢書卷二十七

元 郝經 撰

列傳第二十四

魏

曹叡

明帝

曹芳

齊王

謹案曹叡曹芳傳文全闕止存議贊

議曰曹丕一時偽定享國日淺而叡承之叨據中夏漢人來討吳兵亟至殆無寧歲正君臣盱食之秋乃遽為

秦皇漢武之事罷民以逞至使公卿百官負土雖姿度

英發有帝王之聚魯昭之童心殆未除也

原注左氏傳襄公薨立齊

歸之子公子稠比葬三易衰衰衽如故衰於是昭公十九年矣猶有童心君子是以知其不能終也

秦人

佳兵血流海內而呂政亂其脣

原注史記秦安國君子楚質于趙呂不韋賈邯

鄆見之曰此奇貨可居乃入秦說華陽夫人使言於昭王約以子楚為太子呂不韋取邯鄲姬絕好善舞者與居知有身獻之子楚生子政子楚立是為莊襄王子政即始皇也

楚人僭王馮陵諸夏

而幽王祝其宗

原注史記楚考烈王無子李園進其女弟于春申君知有身進之楚王生子男

立為太子是為楚幽王

操以夏侯冒曹氏莫能審其生出本末劫

遷弒逆陰謀篡漢僅一再傳而芳亦莫知其所由來遽
錯其統於是知有天道敵忍死待懿面命手攜自以為
昭烈而謂懿為孔明誠則誠矣舉家質而托之盜其明
不足稱也嗚呼欺孤而亡於託孤孤其可欺哉

贊曰知臨天權威赫電斷明乃未融崇侈徃亂褫魄託
懿豈為無天忍死召賊昭昭好還

欽定四庫全書

續後漢書卷二十八

元 郝經 撰

列傳第二十五

魏

曹髦

高貴鄉公

曹奐

陳留王

謹案曹髦曹奐傳文全闕止存議贊

議曰魏自司馬懿得政族曹爽黜齊王大福已去天之所廢而髦欲興之宋襄公所以敗于泓而死也

原注左氏傳楚

人伐宋以救鄭宋公將戰大司馬固諫曰天之棄商久矣君將興之弗可救也已弗聽及楚人戰于泓宋師敗績公傷股門官殲焉宋襄公卒傷于泓故也

真知昂命已移垂拱仰成永終

天祿甘于亡滅孝獻之流爾屯之九五曰小貞吉大貞凶髦之謂也豫之六五曰貞疾恒不死亡真之謂也

贊曰昏童纂統大盜移國酷甚漢季可以徵德

欽定四庫全書

續後漢書卷二十九上

元 郝經 撰

列傳第二十六上

魏家人

義例曰帝統在漢故魏吳不得稱為后妃取
歐陽修五代史例與其諸子總為家人傳

曹操卞夫人

武宣皇后
丁夫人

曹丕甄后

文昭皇后

曹叡毛后

明悼皇后

郭后

明元皇后

卞后琅琊開陽人曹丕之母也本倡家生齊郡白亭

原注
魏書

后以漢延熹三年十二月己巳生

黃氣滿室終日父怪之以問卜者王

旦旦曰此貴徵也年二十操於譙納為妾後隨操至雒陽董卓之亂操微服避難袁術傳操凶問操左右在雒者皆歸后止之曰曹君吉凶未可知今日還家明日若

在何面目復相見也正使禍至共死何苦遂止操聞而善之建安初年丁夫人廢遂以后繼室諸子無母者操皆令養之初操有丁夫人又劉夫人有子修及清河長公主劉早卒丁養子修子修亡於穰丁常言殺我兒都

不復念遂哭泣無節操忿之遣歸家欲其意折後操就見之丁方織外云公至踞機如故操撫其背曰顧我共載歸乎不顧又不應操却行立於戶外復云得無尚可邪遂不應操曰真訣矣遂與絕使其家嫁之其家不敢初丁夫人既為嫡又有子修視后母子不足后為繼室不念舊惡因操出行常使人饋遺又私迎之延以正坐而已下之迎送皆如昔日丁謝曰廢放之人夫人何能常爾邪其後丁亡后請操殯葬未許及操病困自慮不

起歎曰我前後行意於心未有所負也假令死而有靈
子脩若問我母所在我將何辭以答乃葬許城南后性
儉約不尚華麗無文繡珠玉操常得名璫數具命后自
選取后取其中者操問其故對曰取其上者為貪取其
下者為偽故取其中者丕為太子左右長御賀曰將軍
拜太子天下莫不喜夫人當傾府藏以賞賜后曰王自
以丕年大故用為嗣我但當以免無教導之過為幸爾
亦何為當重賜遺乎長御還具以語操操悅曰怒不變

容喜不失節是最為難二十四年立為王后策曰夫人

卞氏撫養諸子有母儀之德今進位王后太子諸侯陪

位羣卿上壽咸國內死罪一等二十五年操卒丕即王

位尊后曰王太后及篡代尊曰皇太后稱永壽宮

魏書后以

國用不足咸損御食諸金銀器物皆去之東阿王植太
后少子最愛之後植犯法為有司所奏文帝令太后弟
子奉車都尉蘭持公卿議白太后太后曰不意此兒所
作如是汝還語帝不可以我故壞國法及自見帝不以
為言裴松之曰案大帝夢磨錢欲使丈減而更愈明以
問周宣宣答曰此陛下家事雖意欲爾而太后不聽則
太后用意不得如此書所言也魏書又曰太后每隨軍
征行見高年白首輒住車呼問賜與絹帛對之涕泣曰

恨父母不及我時也太后每見外親不假以顏色常言居處當務節儉不當望賞賜念自佚也外舍常怪吾遇之太薄吾自有常德故也吾事武帝四五十行儉日久不能自變為奢有犯科禁者吾且能加罪一等耳莫望錢米恩貸也帝為太后弟秉起第第成太后幸第請諸家外親設宴厨無異膳太后左右菜食粟飯無魚肉其儉如此

石欲追封后父母尚書陳羣奏曰陛下以聖德應運受命創業革制當永為後式案典籍之文無婦人分土命爵之制在禮典婦因夫爵秦違古法漢氏因之非先王之令典也不曰此議是也其勿施行以作著詔下藏之臺閣永為後式曹叡立尊后曰太皇太后太和

四年春始追諡后祖父廣曰開陽恭侯父遠曰敬侯祖

母周封陽都君及恭侯夫人皆贈印綬其年六月后卒

謹案魏志明帝紀作六月與此合卞后傳作五月者誤

七月合葬高陵

謹案魏志此下有后

弟秉諸人事跡今此無之而目錄亦無附傳人名與漢后妃傳吳家人傳義例不合恐係大典脫誤

甄后中山無極人漢太保甄邯之後曹叡之母也世二

千石家父逸上蔡令娶常山張氏生三男五女長男豫

早終次儼舉孝廉大將軍掾曲梁長次堯舉孝廉長女

姜次脫次道次榮次即后后始生家中髣髴見人持玉

衣覆其上后三歲逸卒號慕如成人相者劉良指后曰

此女貴乃不可言

原注魏書后自少至長不好戲弄至八歲外有立騎馬戲者家人諸姊皆上閣觀之

后獨不行諸姊怪問之答言此豈女人之所觀邪年九歲喜書視字輒識數用諸兄筆硯兄為后言汝當習女工用書為學當作女博士邪后答言聞古者賢女未有不學前世成敗以為己誠不知書何由見之時天

下兵亂加以飢饉百姓皆賣金銀珠玉寶物后家大有

儲穀頗以穀易之后年十餘歲白母曰今世亂而多買

寶物匹夫無罪懷璧其罪又近左皆饑乏

謹案近左陳志作左右

不如以穀振給廣恩惠也舉家稱善即從后言

原注魏書后年

十四喪中兄儼悲哀過制事寡嫂謙敬事處其勞拊養儼子慈愛甚篤后母性嚴待諸婦有常數諫母兄不幸早終婦年少守節顧留一子以大義言之待之當如婦愛之宜如女母感后言流涕便令后與嫂共止寢息坐起常相隨

恩愛益密

建安中索紹為中子熙納之熙出為幽州后

留養姑及鄴城破曹丕先入袁尚府后被髮垢面垂涕

立紹妻劉後丕問之劉言男熙妻也顧擘髮髻以巾拭

面姿貌絕倫丕去劉謂后曰不憂死矣丕遂納之有寵

生獻及東鄉公主

原注魏畧熙出幽州后留侍姑及鄴城破紹妻及后共坐皇堂上大帝入

紹舍見紹妻及后后怖以頭伏姑膝上紹妻兩手自搏大帝謂曰劉夫人云何如此令新婦舉頭姑乃捧后令

仰文帝就視見其顏色非凡稱數之太祖聞其意遂為
迎取魏書后寵愈隆而彌自挹損後宮有寵者勸勉之
其無寵者慰誨之每因閑宴常勸帝言昔黃帝子孫蕃
育蓋由妾媵衆多乃獲斯祚爾所願廣求淑媛以豐繼
嗣帝心嘉焉其後帝欲遣任氏后請于帝曰任既鄉黨
名族德色妾等不及也如何遣之帝曰任情猶急不婉
順前後愈吾非一是以遣之爾后流淚固請曰妾受敬
遇之恩衆人所知必謂任之出是妾之由上懼有見私
之譏下受專寵之罪願重留意帝不聽遂出之十六年
十月太祖征闕中武宣皇后從留孟津帝居守鄴時武
宣皇后體少不安后不得定省憂怖晝夜泣涕左右驟
以差問告后猶不信曰夫人在家故疾每動輒歷時今
疾便差何速也此欲慰我意爾憂甚後得武宣皇后還
書說疾已平復后乃懽悅十七年正月大軍還鄴后朝
武宣皇后望幄座悲喜感動左右武宣皇后見后如此
亦泣且謂之曰新婦謂吾前病如昔時因邪吾時小小

爾十餘日即差不當視我顏色乎嘆嗟曰此孝婦也二十一年太祖東征武宣皇后文帝及明帝東鄉公主皆從時后以病留鄴二十二年九月大軍還武宣皇后左右侍御見后顏色豐盈怪問之曰后與二子别久下流之情不可為念而后顏色更盛何也后笑答之曰諱等自隨夫人我當何憂后之賢明以禮自持如此 延

康元年夏六月丕南征后留鄴黃初元年冬十月丕篡

代山陽公奉二女以嬪于丕郭后李陰貴人並愛幸

后愈失意有怨言丕大怒二年六月遣使賜死葬于鄴

原注魏書有司奏建長秋宮帝璽書迎后詣行在后上表曰妾聞先代之興所以饗國久長垂祚後嗣無不由后妃焉故必審選其人以興內教今踐祚之初誠宜登進賢淑統理六宮妾自省愚陋不任榮盛之事加以寢

疾敢守微志璽書三至而后三讓言甚懇切時盛夏帝欲須秋涼乃更迎后會后疾遂篤夏六月丁卯崩於鄴帝哀痛咨嗟策贈皇后璽綬裴松之曰春秋之義內大惡諱小惡不書大帝之不立甄氏及如殺害事有明審魏史若以為大惡邪則宜隱而不言若謂為小惡邪則不應假為之辭而崇飾虛文乃至於是異乎所聞於舊史推此而言其稱卞甄諸后言之也子獻立有司奏請善皆難以實論陳氏刪落良有以也

追謚曰蓋孝敬之道篤乎其親乃四海所以承化天地所以明察是謂生則致其養歿則光其靈誦述以盡其美宣揚以顯其名者也今陛下以聖懿之德紹承洪業至孝烝烝通於神明遭離殷憂每勞謙讓先帝遷神山陵

大禮既備至於先后未有顯謚伏惟先后恭讓著於幽微至行顯於不言化流邦國德侔二南故能膺神靈嘉祥為大魏世妃雖夙年登遐萬載之後永播融烈后妃之功莫得而尚也案謚法聖聞周達曰文德明有功曰昭昭者光明之至盛久而不昧者也宜上尊謚曰文昭皇后是月三公又奏曰自古周人始祖后稷又特立廟以祀姜嫄今文昭皇后之於萬嗣聖德至化豈有量哉夫以皇家世祀之尊而克讓允恭固推盛位神靈遷化而

無寢廟以承享禮非所以報顯德昭孝敬也稽之古制
宜依周禮先妣別立寢廟遂使司空王朗持節奉策以
太牢告祠于陵又別立寢廟太和元年三月以中山魏
昌之安城鄉戶千追封逸謚曰敬侯適孫像襲爵四月
初營宗廟掘地得玉璽方一寸九分其文曰天子羨思
慈親獻為之改容以太牢告廟又嘗夢見后於是差次
舅氏親疏高下叙用各有差賞賜累鉅萬以像為虎賁中
郎將是月后母卒帝制總服臨喪百僚陪位四年十一

月以后舊陵庫下使像兼太尉持節詣鄴昭告后土十
二月改葬朝陽陵像還遷散騎常侍青龍二年追謚后
兄儼曰安城鄉穆侯夏吳人侵揚州以像為伏波將軍
持節監諸將東征還復為射聲校尉三年卒追贈衛將
軍改封魏昌縣謚曰貞侯子暢嗣又封暢弟溫韓艷皆
為列侯四年改逸儼本封皆曰魏昌侯謚如故封儼妻
劉為東鄉君又追封逸妻張為安喜君景初元年夏有司
議定七廟冬又奏曰蓋帝王之興既有受命之君又有

聖妃協于神靈然後克昌厥世以成王業焉昔高辛氏
卜其四妃之子皆有天下而帝摯陶唐商周代興周人
上推后稷以配皇天追述王初本之姜嫄特立宮廟世
世享嘗周禮所謂奏夷則歌中呂舞大濩以享先妣者
也詩人頌之曰厥初生民時維姜嫄言王化之本生民
所自又曰閔宮有恤實實枚枚赫赫姜嫄其德不回詩
禮所稱姬宗之盛其美如此大魏期運繼於有虞然崇
弘帝道三世彌隆廟祧之數實與周同今武宣皇后文

德皇后各配無窮之祚至於文昭皇后膺天靈符誕育
明聖功濟生民德盈宇宙開諸後嗣乃道化之所興也
寢廟特祀亦姜嫄之閼宮也而未著不毀之制懼論功
報德之義萬世或闕焉非所以昭孝示後世也文昭廟
宜世世享祀奏樂與祖廟同永著不毀之典以播聖善
之風於是與七廟議並勒金策藏之金匱獻思念舅氏
不已暢尚幼景初末以暢為射聲校尉加散騎常侍又
特為起大第獻親臨之又於其後園為母起觀廟名其

里曰渭陽里以追思母氏也嘉平三年正月暢卒追贈車騎將軍謚曰恭侯子紹嗣太和六年獻愛女淑卒追封淑為平原懿公主為之立廟取后亡從孫黃與合葬追封黃列侯以夫人郭氏從弟惠為之後承甄氏姓封惠為平原侯襲公主爵青龍中又封后從兄子毅及像弟三人皆為列侯嘉平中復封暢子二人為列侯暢弟溫字仲舒與郭建及惠等皆后族溫本國侯進為輔國大將軍加侍中領射聲校尉泰始元年晉武帝篡代加溫位

特進

郭后安平廣宗人也祖世長吏

原注魏書父永官至南郡太守謚敬侯母姓董

氏即堂陽君生三男二女長男浮高唐令次女昱次即后后弟都弟成后以漢中平元年三月乙卯生生而

有異常

后少而父永奇之曰此吾女中王也遂以女王為

字早失二親喪亂流離沒於銅鞮侯家曹操為魏公入

東宮后有智數時有獻納不定為嗣后有謀焉及即王

位后為夫人既篡代進貴嬪甄后之死由后之寵也黃

初三年丕欲立為后中郎棧潛上疏曰在昔帝王之治

天下不惟外輔亦有內助治亂所由盛衰從之故西陵

配黃英娥降媯並以賢明流芳上世

原注史記黃帝居軒轅之丘而娶於

西陵之女是為嫫祖嫫祖為黃帝正妃生二子曰玄桀
囂昌意皆有天下堯以二女娥皇女英妻舜于媯汭桀

奔南巢禍階妹喜紂以炮烙怡悅妲己

原注國語夏桀伐有施施人以

妹喜女焉淮南子湯敗桀

於歷山桀與妹喜同舟浮

江奔南巢之山而死

列女傳紂嬖妲己以膏銅柱下

加之炭令有罪者行焉輒墮炭中妲己笑名曰炮烙之刑

是以聖哲慎立元妃必取

先代世族之家擇其令淑以統六宮虔奉宗廟陰教聿

修易曰家道正而天下定由內及外先王之令典也春

秋書宗人釁夏云無以妾為夫人之禮齊桓誓命于葵
丘亦曰無以妾為妻今後宮嬖寵常亞乘輿若因愛登
后使賤人暴貴臣恐後世下陵上替開張非度亂自上始也
石不從遂立為后后上表謝曰妾無皇英釐降之節又
非姜任思齊之倫

原注詩思齊大任文王之
母思媚周姜京室之婦

誠不足以

假充女君之盛位處中饋之重任后自在東宮及即尊
位雖有異寵心愈恭肅供養永壽宮以孝聞是時柴貴
人亦有寵后教訓獎導之後宮諸貴人時有過失常彌

覆之有譴讓輒為不言其本末丕或大有所怒至為之
頓首請罪是以六宮無怨性儉約不好音樂常慕漢明
德馬后之為人后早喪兄弟以從兄表繼永後拜奉車
都尉外親劉斐與他國為婚後聞之敕曰諸親戚嫁娶
自當與鄉里門戶匹敵者不得因執彊與他方人婚也
后姊子孟武還鄉娶妾后止之遂敕諸姻家曰今世婦
女少當配將士不得因緣取以為妾也宜各自慎無為
罰首漢氏椒房之家少能自全者皆由驕奢取禍可不

慎乎五年不東征后留許昌永始臺時霖雨百餘日城樓多壞有司奏請移止后曰昔楚昭王出遊貞姜留漸臺江水至使者迎而無符不去卒沒今帝在遠吾幸未有是患而便移止奈何群臣莫敢復言六年不復東征至廣陵后留譙宮時表留宿衛欲遏水取魚后曰水當通運漕又少材木奴客不在目前當復私取官竹木作梁遏今奉車所不足者豈魚乎曹叡立尊后為皇太后稱永安宮太和四年詔封表安陽亭侯又進爵鄉侯增

邑并前五百戶遷中壘將軍以表子詳為騎都尉其年
追謚后父永為安陽鄉敬侯母董為都鄉君遷表昭德
將軍加金紫位特進表第二子訓為騎都尉及孟武母
卒欲厚葬起祠堂后止之曰喪亂以來墳墓無不發掘
皆由厚葬也首陽陵可以為法初甄后臨沒以獻屬李
夫人而不令后養之獻既立李夫人常告獻以甄后之
死皆后譖殺之及殯令披髮覆面以糠塞口而立為皇
后獻哀恨流涕數泣問甄后死狀后曰先帝自殺之何

以責問我且汝為人子可追讎死父為前母枉殺後母邪
叡怒逼責之青龍三年春后以憂暴卒於許昌敕殯者皆

如甄后故事以終制營陵三月庚寅葬首陽陵西

原注魏書載哀

策曰惟青龍三年三月壬申皇太后梓宮啓殯將葬於首陽之西陵哀子皇帝叡親奉冊祖載遂親遣奠叩心躡踊號咷仰訴痛靈魂之遷幸悲容車之向路背三光以潛翳就黃壚而安厝嗚呼哀哉昔二女妃虞帝道以彰三母殯周聖善彌光既受多祉享國延長哀哀慈妣興化閨房龍飛紫極作合聖皇不虞中年暴離災歿愍予小子玆焚摧傷魂雖永逝定省曷忘嗚呼哀哉
謹案魏志葬首陽陵西下有帝進表爵為觀澤侯至于釗嗣一百餘字今無之恐係大典脫漏

曹叡毛后河內人也黃初中以選入東宮叡時為平原

王進御有寵出入與同輿輦及即位以為貴嬪太和元年立為皇后后父嘉拜騎都尉后弟曾郎中初叡為王納河內虞氏為妃既即位虞氏不得為后卞太后慰勉焉虞氏曰曹氏自好立賤未有能以義舉者也然后職內事君聽外政其道相由而成苟不以善始必不能以令終殆必由此亡國喪祀矣遂絀還鄴宮進嘉為奉車都尉曾騎都尉寵賜隆渥頃之封嘉博平鄉侯遷光祿大夫曾駙馬都尉嘉本典虞車工卒暴富貴叡令朝臣

會其家飲宴其容止舉動甚蚩駘語輒自謂侯身時人

以為笑

原注孫盛曰古之王者必求令淑以對揚至德恢王化於闕睢致淳風於麟趾及臻三季並亂

茲緒義以情溺位由寵昏貴賤無章下陵上替興衰隆廢皆是物也魏自武王暨於烈祖三后之升起自幽賤

本既卑矣何以長世詩云絺兮綌兮淒其以風其此之謂乎

後又加嘉位特進曾遷

散騎侍郎青龍三年嘉卒追贈光祿大夫改封安國侯

增邑五百并前千戶謚曰節四年進封后母夏為野王

君及獻章郭后后寵日弛景初元年獻游後園召才人

以上曲宴極樂郭后曰宜延皇后獻弗許乃禁左右使

不得宣后知之明日獻見后后曰昨日游宴北園樂乎
獻以左右洩之殺十餘人賜后死然猶加謚葬愍陵遷
曾散騎常侍後徙為羽林虎賁中郎將原武典農

郭后西平人也世河右大族黃初中本郡反叛没入宮
獻立甚見愛幸拜為夫人叔父立為騎都尉從父芝為
虎賁中郎將獻疾困立為皇后曹芳立尊為皇太后稱
永寧宮追封謚后父滿為西都定侯以立子建紹其爵
封后母杜為邵陽君芝遷散騎常侍長水校尉

原注魏
畧諸郭

之中芝最壯直先時自以他功封侯立宣德將軍皆封列侯建兄惠出養

甄氏惠及建俱為鎮護將軍皆封列侯並掌宿值三主

弱幼司馬氏專政與奪大事皆先咨於后而後行毋丘

儉鍾會等之亂咸假其命而以為辭焉景元四年十二

月辛丑年二月葬高平陵西晉泰始中建卒子嘏嗣為

給事中

原注陳志后妃傳序易稱男正位乎外女正位乎內男女正天地之大義也古先哲王莫不明

后妃之制順天地之德故二妃嬪嬙虞道克隆任姒配姬周室用熙廢興存亡恒此之由春秋說云諸侯九女

考之情理不易之典也而末世奢縱肆其侈欲至使男女怨曠感動和氣惟色是從不本淑懿故風教凌遲而大

網毀泯豈不惜哉嗚呼有國有家者其可以永鑒矣評曰魏后妃之家雖云富貴未有若袁漢乘非其據宰割朝政者也鑒往易軌於斯為美追觀陳群之議撻潛之論適足以為百王之規典垂憲範乎後葉矣

議曰魏內官之制皆因漢舊自夫人以下世有增損曹操建國始命王后其下五等有夫人有昭儀有婕妤有容華有美人曹丕增貴嬪淑媛修容順成良人曹叡增淑妃昭華脩儀除順成官太和中始復命夫人登其位於淑妃之上自夫人以下爵凡十二等貴嬪夫人位次皇后爵無所視淑妃位視相國爵比諸侯王淑媛位視

御史大夫爵比縣公昭儀比縣侯昭華比鄉侯修容
比亭侯修儀比關內侯僖仔視中二千石容華視真二
千石美人視比二千石良人視千石曹丕篡代創漢母
后之禍著令羣臣不奏事太后后族不得輔政其意亦
美矣然而丕叡皆惑紫色之讒使綠衣上僭而殺嫡后
並失家則及司馬氏篡竊放弑三君皆令母后處可下
詔行事卒移其國又甚二漢之季矣

贊曰北鷄當陽漢家以索魏氏創時壺關申約躬弗蹈

道廢甄登郭琴瑟更張貞風遂薄

欽定四庫全書

續後漢書卷二十九中

元 郝經 撰

列傳第二十六中

曹操三子

曹彰 任城威王

曹植 陳思王
子志

曹熊 蕭懷王

曹操卞后四子丕彰植熊

彰字子文少善射御膂力過人手格猛獸不避險阻數從征伐志意慷慨操常抑之曰汝不念讀書慕聖道而

好乘汗馬擊劒此一夫之勇何足貴也課彰讀詩書彰謂左右曰丈夫當為衛霍將十萬騎馳沙漠驅戎狄立功建號爾何能作博士耶操嘗問諸子所好使各言其志彰曰好為將操曰為將奈何對曰被堅執銳臨難不顧為士卒先賞必行罰必信操大笑建安二十一年封鄢陵侯二十二年代郡烏桓反以彰為北中郎將行驍騎將軍臨發操誡彰曰居家為父子受事為君臣動以王法從事爾其戒之彰北征入涿郡界叛胡數千騎卒

至時兵馬未集惟有步卒千人騎數百匹用田豫計固守要隙虜乃散退彰追之身自搏戰射胡騎應弦而倒者前後相屬戰過半日彰鎧中數箭意氣益厲乘勝逐

北至於桑乾

原注魏志注臣松之案桑乾縣屬代郡今北虜居之號為索干之都

去代二

百餘里長史諸將皆以為新涉遠士馬疲頓又受節度不得過代不可深進違命輕敵彰曰率師而行惟利所在何節度乎胡走未遠追之必破從令縱敵非良將也遂上馬令軍中後出者斬一日一夜與虜相及擊大破

之斬首獲生以千數彰乃倍常科大賜將士無不悅喜
時鮮卑大人軻比能將數萬騎觀望強弱見彰力戰所
向皆破乃請服北方悉平時操在長安召彰詣行在所
彰自代過鄴丕謂彰曰卿新有功今西見上宜勿自伐
應對常若不足者操在漢中昭烈駐兵山頭使劉封下
挑戰操怒大罵曰賣履舍兒乃使假子拒汝公乎呼我
黃鬚來令擊之乃召彰彰晨夜進到長安而操已從漢
中還彰見操如丕言歸功諸將操喜持彰鬚曰黃鬚兒

竟大奇也彰鬚黃故操稱之操東還以彰行越騎將軍留長安操至雒陽得疾驛召彰未至操卒既至問先王璽綬所在因謂臨淄侯植曰先王召我欲立汝也植曰不可不見袁氏兄弟乎丕立詔曰先王之道庸勲親親並建母弟開國成家故能藩屏大宗禦侮厭難彰前受命北伐清定朔土厥功茂焉增邑五千并前萬戶與諸侯皆就國彰自以見任於操且有功冀遂見授任而隨例就國意甚不悅不待遣而去丕以鄢陵堵薄使治中

年不既篡代因封彰中年其後丕如許昌北州諸侯畏
彰剛嚴過中年不敢輒止皆速去黃初二年進爵為公
三年立為任城王四年朝雒陽不即得見忿恚暴卒於

邸謚曰威

原注魏志注魏氏春秋曰初彰問璽綬將有
異志故來朝不即得見彰忿恚暴薨謹案

世說曰魏文帝忌弟任城王驍壯因在下太后間共圍
碁並敕素文帝以毒置諸素碁中自選可食者而進王
弗悟逆襟進之既中毒太后索水救之帝預勅左右毀
瓶摧太后使跪趨井無以汲須臾遂卒復欲害東阿太
后曰汝已殺我任城不得復殺我東阿今觀魏氏春秋
云來朝不即得見彰忿恚暴薨安有圍碁進碁之事且
太后使跪趨井亦非情事

世說之語恐不足據也

至葬賜鸞輅龍旂虎賁百人

如漢東平王故事子楷嗣徙封中年五年改封任城縣
太和六年復改封任城國食五縣二千五百戶青龍三
年楷坐私遣官屬詣中尚方作禁物削縣二千戶正始

七年徙封濟南三千戶景元初連增邑凡四千四百戶

原注

裴松之曰楷泰始初為崇化少府見百官名魏志評
曰任城武藝壯猛有將領之氣陳思文才富鑿足以自
通後業然不能克讓遠防終致携隙傳曰楚則失之矣
而齊亦未為得也其此之謂歟魚豢曰謗言貪不學
儉卑不學恭非人性分也勢使然耳此實然之勢信不
虛矣假令太祖防遏植等在於疇昔此賢之心何緣有
窺望乎彰之挾恨尚無所至至於植者乃令楊修以倚
注遇害丁儀以希意族滅哀夫子每覽植之華采思若

有神以此推之太祖之動心亦良有以也

植字子建年十歲餘誦讀詩論及辭賦數十萬言善屬文操嘗視其文謂植曰汝倩人耶植跪曰言出為論下筆成章顧當面試奈何倩人時鄴銅雀臺新成操悉將諸子登臺使各為賦植援筆立成操甚異之

原注陰滄魏記載植

賦曰從明后而嬉游兮登層臺以娛情見太府之廣開兮觀聖德之所營建高門之嵯峨兮浮雙闕乎太清立中天之華觀兮連飛閣乎西城臨漳水之長流兮望園果之滋榮仰春風之和穆兮聽百鳥之悲鳴天雲垣其既立兮家顧得而獲逞揚仁化於字內兮盡肅恭於上京惟桓文之為盛兮豈足方乎聖明休矣美矣惠澤遠

揚翼佐我皇家兮寧彼四方同天地之規量兮齊日月
之輝光永貴尊而無極兮等年壽於東皇云云太祖深
異之性簡易不治威儀輿馬服飾不尚華麗每進見難問

應聲而對特見寵愛建安十六年封平原侯十九年徙
封臨淄侯操伐孫權使植留守鄴戒之曰吾昔為頓丘
今年二十三思此時所行無悔於今汝年亦二十三矣
可不勉與植既以才見異而丁儀丁廙楊修等為之羽
翼操狐疑幾為太子者數矣而植任性而行不自雕勵
飲酒不節而不御之以術矯情自飾宮人左右並為之

說故遂定為嗣二十三年增植邑五千并前萬戶植嘗
乘車行馳道中開司馬門出操大怒公車令坐死由是
重諸侯科禁而植寵日衰植妻衣繡操登臺見之以違
制命還家賜死操令曰始者謂子建兒中最可大事自
私出開司馬門至金門令吾異目視此兒矣又令曰諸
侯長史及帳下吏知吾出輒將諸侯行意否從子建開
司馬門來吾都不信諸侯也恐吾適出便復私出故攝
將行不可恒使吾爾

謹案爾冊府元龜作以語較順

誰為心腹也操既

慮始終之變以楊修頗有才策而又袁氏之甥也於是

以罪誅修植益內不自安

原注魏志典略曰楊修字德祖太尉彪子也謙恭辯博建

安中舉孝廉除郎中丞相請署倉曹屬主簿是時軍國多事修總知內外事皆輟意自魏太子以下並爭與交好又是時臨淄侯植以才捷愛幸來意投修數與修書書曰數日不見思子為勞想同之也僕少好辭賦迄至於今二十有五年矣然今世作者可畧而言也昔仲宣獨步于漢南孔璋鷹揚于河朔偉長擅名于青土公幹振藻于海隅德璉發跡于大魏足下高視于上京當此之時人人自謂握靈蛇之珠家家自謂抱荆山之玉也吾王于是設天網以該之頓八紘以掩之今盡集茲國矣然此數子猶不能飛翰絕跡一舉千里也以孔璋之才不閑辭賦而多自謂與司馬長卿同風譬畫虎不成還為狗者也前為書凋之反作論盛道僕贊其文夫鍾

期不失聽于今稱之吾亦不敢妄歎若畏後世之嗤余也
世人著述不能無病僕常好人譏彈其文有不善者應
時改定昔丁敬禮嘗作小文使僕潤飾之僕自以才不
能過若人辭不為也敬禮云卿何所疑難乎文之佳麗
吾自得之後世誰相知定吾文者耶吾嘗歎此達言以
為美談昔尼父之文辭與人通流至于制春秋游夏之
徒不能措一字過此而言不病者吾未之見也蓋有南
威之容乃可以論于淑媛有龍淵之利乃可以議于割
斷劉季緒才不逮于作者而好詆呵文章倚撫利病昔
田巴毀五帝罪三王咎五伯于稷下一旦而服千人魯
連一說使終身杜口劉生之辨未若田氏今之仲連求
之不難可無數息乎人各有所好尚蘭茝蓀蕙之芳衆
人之所好而海畔有逐臭之夫咸池六英之發衆人所
樂而墨翟有非之之論豈可同哉今往僕少小所著辭
賦一通皆與夫街談巷說必有可采擊轅之歌有應風
雅匹夫之思未易輕棄也辭賦小道固未足以揄揚大

范彭示來世也昔揚子雲先朝執戟之臣耳猶稱壯夫不為也吾雖薄德位為藩候猶庶幾戮力上國流惠下民建永世之業流金石之功豈徒以翰墨為勲績辭頌為君子哉若吾志不果吾道不行亦將採史官之貴錄辭時俗之得失定仁義之秉成一家之言雖未能藏之名山將以傳之同好此要之白首豈可以今日論乎其言之不忤恃惠子之知我也明早相迎書不盡懷修荅曰不侍數日若彌年載豈獨愛顧之隆使係仰之情深耶損辱來命蔚矣其文誦讀反覆雖風雅頌不足過也若仲宣之擅江表陳氏之跨冀域徐劉之顯青豫應生之發魏國斯皆然矣至于修者聽來風聲仰德不暇目周章於省覽何惶駭於高視哉伏惟君侯少長貴盛體旦發之質有聖善之教遠近觀者徒謂能宣昭懿德光贊大業而已不謂復能兼覽傳記留思文章今乃含王超陳度越數子觀者駭視而拭目聽者傾首而聳耳非夫體通性達受之自然其誰能至於此乎又嘗親見執事握牘持筆有所造作若成誦在心借書

于手曾不斯須少留思慮仲尼日月無所踰焉修之仰望殆如此矣是以對鵠而辭作暑賦彌日而不獻見西施之容歸憎其貌者也伏想執事不知其然猥受顧賜教使刑定春秋之成莫能損益呂氏淮南字直千金然而弟子鉗口市人拱手者聖賢卓犖固所以殊絕凡庸也今之賦頌古詩之流不更孔公風雅無別耳修家子雲老不晚事彊著一書悔其少作若此仲尼周旦之徒則皆有愆乎君侯忘聖賢之顯迹述鄙愚之故言竊以為未之思也若乃不忘經國之大美流千載之英聲銘功景鍾書名竹帛此自雅量素所蓄也豈與文章相妨害者歟受所惠竊備矇眊歌誦而已敢望惠施以泰莊氏季緒瑣瑣何足以云其相往來如此甚數植後以驕縱見疏而植故連綴修不止修亦不敢自絕至二十四年秋公以修前後漏泄言教交關諸侯乃收殺之修臨死謂故人曰我固自以死之晚也其意以為坐曹植也修死後百餘日而太祖薨太子立遂有天下初修以所

得王髦劔奉太子太子常服之及即尊位在洛陽從容
出宮追思修之過薄也撫其劔駐車顧左右曰此楊德
祖所說王髦劔也髦今馬在及召見之賜髦較帛擊
虞文章志曰劉季緒名修劉表子官至東安太守著詩
賦頌六篇臣松之案呂氏春秋曰人有臭者其兄弟
妻妾皆莫能與居其人自若而居海上海上有悅其
臭者晝夜隨之而不能去此植所云逐臭之夫也田巴
事出魯連子亦見皇覽文多故不載世語曰脩年二
十五以名公子有才能為太祖所器與丁儀兄弟皆欲
以植為嗣太子患之以車載廢簾內朝歌長吳質與謀
脩以白太祖未及推驗太子懼告質質曰何患明日復
以簾受絹車內以惑之脩必復重白重白必推而無驗
則彼受罪矣世子從之脩果白而無人太祖由是疑焉
脩與賈逵王陵並為主簿而為植所友每當就植處事
有闕忖度太祖意豫作答教十餘條勅門下教出以次答
教裁出答已入太祖怪其捷推問始泄太祖遣太子及

植各出鄴城一門密勅門不得出以觀其所為而還脩
先戒植若門不出侯侯受王命可斬守者植從之故脩
遂以交構賜死脩子囂囂子準皆知名於晉世囂泰始
初為典軍將軍受心膺之任早卒準字始丘惠帝末為
冀州刺史荀綽冀州記曰準見王綱不振遂縱酒不
以官事為意逍遙卒歲而已成都王知準不治猶以其
為名士惜而不責召以為軍謀祭酒府散停家關東諸
侯議欲以準補三事以示懷賢尚德之舉事未施行而
卒準子嶠字國彥髦字士彥並為後出之俊準與裴頠
樂廣善連往見之頠性弘方愛嶠之有高韻謂準曰嶠
當及卿然髦少減也廣性清淳愛髦之有神檢謂準曰
嶠自及卿然髦尤精出準歎曰我二兒之優劣乃裴樂
之優劣也評者以為嶠雖有高韻而神檢不逮廣言為
得傳揚云嶠似準而疎嶠弟俊字惠彥最清出嶠髦皆
為二千石

俊太傅掾

二十四年曹仁為關羽所圍操以植為南中

郎將行征虜將軍欲遣救仁呼有所敕戒丕欲植飲酒
偁而醉之植不能受命於是悔而罷之丕立誅丁儀丁
廙併其男口植與諸侯王並就國黃初二年監國謁者
灌均希指奏植醉酒悖慢劫脅使者有司請治罪丕以
卞后故貶爵安鄉侯其年丕詔曰植朕之同母弟朕於
天下無所不容而况植骨肉之親乎其改封鄴城侯三
年立為鄴城王邑二千五百戶

謹案陳思王集今曰孤
前令寫灌均所上孤章

三臺九府所奏事及詔書一通
置之座隅欲朝夕諷詠以自警省

四年徙封雍丘王其

年朝雒陽未到自念有過當謝乃留從官關東單身微行欲入見清河長公主因主謝而關吏以聞丕使人逆之不得見卞后以為自殺對丕泣會植科頭負斧鑕徒跣詣闕下卞后乃喜及見丕猶嚴顏色不與語又不使冠履植伏地涕泣卞后為不樂詔乃聽復王服明日上䟽曰臣自抱釁歸藩刻肌刻骨追思罪戾晝分而食夜分而寢誠以天網不可重離聖恩難可再恃竊感相鼠之篇無禮遄死之義形影相弔五情愧赧以罪棄生則

違古賢夕改之勸忍活苟全則犯詩人胡顏之譏伏惟
陛下德象天地恩隆父母施暢春風澤如時雨是以不
別荆棘者慶雲之惠也七子均養者尸鳩之仁也舍罪
責功者明君之舉也矜愚愛能者慈父之恩也是以愚
臣徘徊於恩澤而不能自棄者也前奉詔書臣等絕朝
心離志絕自分黃耆無復執珪之望不圖聖詔猥垂齒
召至止之日馳心輦轂僻處西館未奉闕庭踴躍之懷
瞻望反仄謹拜表獻詩二首其一曰

謹案集作
責躬詩

於穆顯

考時惟武皇受命于天寧濟四方朱旂所拂九土披攘
玄化滂流荒服來王超商越周與唐比縱篤生我皇奕
世再聰武則肅烈文則時雍受禪炎漢君臨萬邦萬邦
既化率由舊則廣命懿親以藩王國帝曰爾侯君茲青
土奄有海濱方周於魯車服有輝旂章有序濟濟雋乂
我弼我輔伊予小子恃寵驕盈舉挂時網動亂國經作
屏作藩先軌是隳傲我皇使我朝儀國有典刑我削
我紕將寘於野元兇是率明明天子時篤同類不忍我

刑暴之朝肆違彼執憲哀予小子改封充邑于河之濱
肱股勿置有君無臣荒淫之闕誰弼予身焚焚僕夫于
彼冀方嗟予小子乃罹斯殃赫赫天子恩不遺物冠我
玄冕要我朱紱朱紱光大使我榮華剖符授玉王爵是
加仰齒金璽俯執聖策皇恩過隆祇承怵惕咨我小子
頑凶是嬰逝慙陵墓存愧闕庭匪敢傲德實恩是恃威
靈改加足以沒齒昊天罔極性命謹案性命文選作生
命通志作性命與此
合
不圖常懼顛沛抱罪黃墟願蒙矢石建旗東嶽庶立

毫釐微功自贖危軀授命知足免戾甘赴江湘奮戈吳越天啟其衷得會京畿遲奉聖顏如渴如饑心之云慕

愴矣其悲天高聽卑皇肯照微又曰

謹案集作應詔詩

肅承明

詔應會皇都星陳夙駕秣馬脂車命彼掌徒肅我征旅朝發鸞臺夕宿蘭渚芒芒原隰祁祁士女經彼公田樂我稷黍爰有樛木重陰匪息雖有糗糧饑不遑食望城不過面邑匪游僕夫警策平路是由玄駟靄靄揚鑣澍沫流風翼衡輕雲承蓋涉澗之濱緣山之隈遵彼河訢

黃阪是階西濟開谷或降或升駢驂倦路再寢再興將
朝聖皇匪敢晏寧弭節長驚指日遄征前驅舉燧後乘
抗旌輪不輟運鸞無廢聲爰暨帝室稅此西墉嘉詔未
賜朝覲莫從仰瞻城闕俯惟闕廷長懷永慕憂心如酲
丕嘉其辭義優詔答之是時待遇諸國法峻既朝遣歸
任城王彰暴卒植既懷友愛之痛欲與白馬王彪俱還
同路東歸以叙隔濶監國使者不聽奏二王歸藩道路
宜異植發憤告別贈彪詩曰謁帝承明廬逝將歸舊疆

清晨發皇邑日夕過首陽伊維廣且深欲濟川無梁汎
舟越洪濤怨彼東路長顧瞻戀城闕引領情內傷大谷
何寥廓山樹鬱蒼蒼霖雨泥我塗流潦浩縱橫中逵絕
無軌改轍登高岡修阪造雲日我馬玄以黃玄黃猶能
進我思鬱以紆鬱紆將難進

謹案難進志注作
何念此據文選

親愛在

離居本圖相與偕中更不克俱鵠臬鳴衡軛豺狼當路

衢蒼蠅間白黑讒巧令

案志
注作反

親踈欲還絕無蹊攬轡

止踟躕踟躕亦何留相思何終極秋風發微涼寒蟬鳴

我側原野何蕭條白日忽西匿歸鳥赴喬林翩翩厲羽

翼

謹紫歸鳥二句陳志
注移在孤獸二句後

孤獸走索羣銜草不遑食感物

傷我懷撫心長太息太息將何為天命與我違奈何念
同生一往形不歸孤魂翔故城靈樞寄京師存者忽復
過亡沒身自衰人生處一世去若朝露晞年在桑榆間
影響不能追自顧非金石咄嗟令心悲心悲動我神棄
置莫復陳丈夫志四海萬里猶比隣恩愛苟不虧在遠
分日親何必同衾幃然後展殷勤憂思成疾疾無乃兒

女仁

謹案陳志注脫此二句又選本與此合

倉卒骨肉情能不懷苦辛苦

卒何慮思天命信可疑虛無求列仙松子久吾欺變故

在斯須百年誰能持離別永無會執手將何時王其愛

玉體俱享黃髮期收淚即長路援筆從此辭六年丕東

征還過雍丘寓植宮令植作詩不憐之增戶五百

原注世說

魏文帝嘗令陳思王曹植七步成詩如不成行大法即應聲曰煮豆然豆其豆在釜中泣本是同根生相煎何

太急帝感而釋之

曹叡太和元年徙封浚儀二年復還雍丘植

嘗自憤怨抱利器而無所施上疏求自試曰聞士之生

世入則事父出則事君事父尚於榮親事君貴於興國
故慈父不能愛無用之子仁君不能蓄無用之臣夫論
德而授官者考功之君也量能而受爵者畢命之臣也
故君無虛授臣無虛受虛授謂之謬舉虛受謂之尸祿
詩之素餐所由作也昔二虢不辭二國之任其德厚也
原注左氏傳虢仲虢叔王季之穆也為王卿士勲在盟府旦奭不讓燕魯之封其功
大也今臣蒙國重恩三世於今矣正值陛下昇平之際
沐浴聖澤潛潤德教可謂厚幸矣而竊位東藩爵在上

列身被輕煖口厭百味目極華靡耳倦絲竹者爵重祿

厚之所致也退念古之授

謹案授文選作受

爵祿者有異於此

皆以功勤濟國輔主惠民今臣無德可述無功可紀若

此終年無益國朝將挂風人彼已之譏上慙玄冕俯愧

朱紱方今天下一統九州晏如而顧西有違命之蜀東

有不臣之吳使邊境未得脫甲謀臣未得高枕者誠欲

混同宇內以致太和也故啟滅有扈而夏功昭成克商

奄而周德著今陛下以聖明統世將欲率文武之功繼

成康之隆簡賢授能以方叔召虎之臣鎮御四境為國

爪牙者可謂當矣然而高鳥未挂於輕繳淵魚未縣於

釣餌者恐鈎射之術或未盡也昔耿弇不俟光武亟擊

張步言不以賊遺君父

原注後漢書耿弇討張步陳俊謂弇曰虜兵盛可且閉營休士

以須上來弇曰乘輿且到臣子當擊牛釀酒以待百官反欲以賊虜遺君父耶乃出戰自旦及昏大破之故

車右伏劍于鳴轂雍門刎首于齊境

原注說苑趙甲至齊雍門狄請死之

齊王曰鉞鐸之聲未聞矢石未交長兵未接子何務死知為人臣之禮耶雍門狄對曰臣聞之昔王田於圃左

轂鳴車右請死之王曰子何為死車右曰為其鳴吾君也王曰左轂鳴此工師之罪也子何事之有焉車右對曰

吾不見工師之乘而見其鳴吾君也遂刎頸而死有是乎王曰有之雍門狄曰今越甲至其鳴吾君豈左轂之下者車右可以死左轂而臣獨不可死越甲耶遂刎頸而死是日越人引軍退七十里曰齊王有臣鈞如雍門狄疑使越社稷不血食遂歸若此二士豈惡生而尚死齊王葬雍門狄以上卿之禮

哉誠忿其慢主而陵君也夫君之寵臣欲以除患興利

臣之事君必以殺身靖亂以功報主也昔賈誼弱冠求

試屬國請繫單于之頸而制其命終軍以妙年使越欲

得長纓纓其王羈致北闕

原注漢書賈誼曰何不試以臣為屬國之官以主匈奴行

臣之計必繫單于之頸而制其命南越與漢和親乃遣終軍使南越說其王欲令入朝比內諸侯軍自請願

受長纓必羈南越
王而致之闕下
此二臣豈好為誇主而耀世哉志或

鬱結欲逞其才力輸能于明君也昔漢武為霍去病治
第辭曰匈奴未滅臣無以家為固夫憂國忘家捐軀濟
難忠臣之志也今臣居外非不厚也而寢不安席食不
遑味者伏以二方未克為念伏見先武皇帝武臣宿將
年耆即世者有間矣雖賢不乏世宿將舊卒猶習戰陣
竊不自量志在效命庶立毛髮之功以報所受之恩若
使陛下出不世之詔效臣錐刀之用使得西屬大將軍

當一校之隊若東屬大司馬統扁舟之任必乘危蹈險
騁舟奮驪突刃觸鋒為士卒先雖未能擒權馘亮庶將
虜其雄率殲其醜類必效須臾之捷以滅終身之愧使
名挂史筆事列朝策雖身分蜀境首縣吳闕猶生之年
也如微才弗試沒世無聞徒榮其軀而豐其體生無益
於事死無損于數虛荷上位而忝重祿禽息鳥視終於
白首此徒圈牢之養物非臣之所志也流聞東軍失備
師徒小衄輟食棄餐奮袂攘衽撫劍東顧而心已馳於

吳會矣臣昔從先武皇帝南極赤岸東臨滄海西望玉
門北出玄塞伏見所以行兵用軍之勢可謂神妙矣故
兵者不可豫言臨難而制變者也志欲自效於明時立
功於聖世每覽史籍觀古忠臣義士出一朝之命以徇
國家之難身雖屠裂而功銘於鼎鐘名稱於竹帛未嘗
不拊心而歎息也臣聞明主使臣不廢有罪故奔北敗
軍之將用秦魯以成其功

原注謂孟
明曹沫也

絕纓盜馬之臣赦

楚趙以濟其難

原注說苑楚莊王賜羣臣酒燭滅有引
美人衣者援絕冠纓以告王曰賜人酒

醉欲顯婦人之節吾不取也乃命羣臣皆純纓盡帷而去後與晉戰引美人衣者五合五獲以報王呂氏春秋秦穆公乘馬右服失之見野人方食于岐山之陽公笑曰食馬肉不飲酒恐傷汝也賜酒徧飲而去韓之戰食馬者三百餘人闕于車下遂大克晉獲惠公以歸趙當作秦或謂趙氏之先與秦同祖故秦亦謂之趙曲說也謹案裴松之注云秦亦趙姓故互文以避秦字此駁其說臣竊感先帝早崩威

王棄世臣獨何人以堪常久誠恐先朝露填溝壑墳土未乾而身名並滅臣聞騏驎長鳴則伯樂照其能盧狗悲號則韓國知其才是以效之齊楚之路以逞千里之任試之狡兎之捷以驗搏噬之用

原注戰國策楚客謂春中君曰昔騏驎駕

車吳阪遭延負轅而不能進遭伯樂仰而長鳴知伯樂知已也今臣志狗馬之微功竊

自惟度終無伯樂韓國之舉是以於邑而自痛者也夫

臨博而企竦聞樂而竊抃者或有賞音而識道也昔毛

遂趙之陪隸猶假錐囊之喻以寤主立功

原注史記秦國邯鄲昭王

使平原君求救于楚約食客文武具備者二十人俱得十九人毛遂自贊于平原君曰賢士處世譬如

錐之處囊中其末立見今先生處勝之門下三年勝未有所聞遂曰使遂早得處囊中乃穎脫而出非特其末

立見而已也遂與偕如楚卒定從約却秦軍邯鄲下何況巍巍大魏多士之朝而

無慷慨死難之臣乎夫自衒自媒者士女之醜行也干

時求進者道家之明忌也而臣敢陳聞于陛下者誠與國分形同氣憂患共之者也冀以塵霧之微補益山海螢燭末光增輝日月是以敢冒其醜而獻其忠植既上此表知終不見用復自訟曰夫人貴生者非貴其養體好服終竟年壽也貴在代天而理物也夫爵祿者非虛張者也有功德然後應之當矣無功而爵厚無德而祿重或人以為榮而壯夫以為耻故太上立德其次立功蓋功德者所以垂名也名者不滅士之所利故孔子有

夕死之論孟軻有棄生之義彼一聖一賢豈不願久生哉志或有不展也是用喟然求試必立功也嗚呼言之未用欲使後之君子知吾意也三年徙封東阿五年復上疏求問親戚因致其意曰臣聞天稱其高者以無不覆地稱其廣者以無不載日月稱其明者以無不照江海稱其大者以無不容故孔子曰大哉堯之為君惟天為大惟堯則之夫天德之于萬物可謂弘廣矣蓋堯之為教先親後疎自近及遠其傳曰克明峻德以親九族

九族既睦平章百姓及周之文王亦崇厥化其傳曰刑于寡妻至于兄弟以御于家邦是以雍雍穆穆風人詠之昔周公弔管蔡之不咸廣封懿親以藩屏王室傳曰周之宗盟異姓為後誠骨肉之恩爽而不離親親之義實在敦固未有義而後其君仁而遺其親者也伏惟陛下資帝唐欽明之德體文王翼翼之仁惠洽椒房恩照九族羣臣百寮番休遞上執政不廢于公朝下情得展於私室親理之路通慶弔之情展誠可謂恕已治人推

惠施恩者矣至於臣者人道絕緒禁錮明時臣竊自傷
也不敢過望交氣類修人事叙人倫近且婚媾不通兄
弟乖絕吉凶之問塞慶弔之禮廢恩紀之違甚於路人
隔閼之異殊於胡越今臣以一切之制永無朝覲之望
至於注心皇極結情紫闥神明知之矣然天實為之謂
之何哉退惟諸王常有戚戚具爾之心願陛下沛然垂
詔使諸國慶問四節得展以叙骨肉之歡恩全怡怡之
篤義妃妾之家膏沐之遺歲得再通齊義於貴宗等惠

於百司如此則古人之所歎風雅之所詠復存於聖世
矣臣伏自惟省無錐刀之用及觀陛下之所拔授若以
臣為異姓竊自料度不後於朝士矣若得辭遠游戴武
弁解朱組佩青紱駙馬奉車輒得一號安宅京室執鞭
珥筆出從華蓋入侍輦轂承答聖問拾遺左右乃臣丹
誠之至願不離夢想者也遠慕鹿鳴君臣之宴中詠常
棣匪他之誠下思伐木友生之義終懷蓼莪罔極之哀
每四節之會塊然獨處左右惟僕隸所對惟妻子高談

無所與陳發義無所與展未嘗不聞樂而拊心臨觴而
歎息也臣伏以為犬馬之誠不能動人譬人之誠不能
動天崩城隕霜臣初信之以臣心况徒虛語爾若葵藿
之傾葉太陽雖不為之回光然向之者誠也竊自比葵
藿若降天地之施垂三光之明者實在陛下臣聞文子
曰不為福始不為禍先今之否隔友于同憂而臣獨倡
言者臣竊不願於聖世使有不蒙施之物有不蒙施之
物必有慘毒之懷故栢舟有天只之怨谷風有棄予之

歎故伊尹恥其君不為堯舜孟子曰不以舜之所以事堯事其君者不敬其君者也臣之愚蔽固非虞伊至於欲使陛下崇光被時雍之美宣緝熙章明之德者是臣悽悽之誠竊所獨守實懷鶴立企竚之心敢復陳聞者冀陛下儻發天聰而垂神聽也詔報曰蓋教化所由各
有隆弊非皆善始而惡終也事使之然故夫忠厚仁及草木則行葦之詩作恩澤衰薄不思九族則角弓之章刺今令諸國兄弟情理簡怠妃妾之家膏沐疏略朕縱

不能敦而睦之王援古喻義備悉矣何言精誠不足以
感通哉夫明貴賤崇親親禮賢良順少長國之綱紀本
無禁錮諸國通問之詔也矯枉過正下吏懼譴以至於
此爾已敕有司如王所訴植復上疏陳審舉之義曰臣
聞天地協氣而萬物生君臣合德而庶政成五帝之世
非皆智三季之末非皆愚用與不用知與不知也既時
有舉賢之名而無得賢之實必各援其類而進矣諺曰
相門有相將門有將夫相者文德昭者也將者武功烈

者也文德昭則可以匡國朝致雍熙稷契夔龍是也武功烈則可以征不庭威四夷南仲方叔是也昔伊尹之為滕臣至賤也呂尚之處屠釣至陋也及其見舉于湯武周文誠道合志同玄謨神通豈復假近習之薦因左右之介哉書曰有不世之君必能用不世之臣用不世之臣必能立不世之功殷周二王是矣若夫齷原注於角反齷原注

側角反

近步遵常守故安足為陛下言哉故陰陽不和三

光不暢官曠無人庶政不整者三司之責也疆場騷動

方隅內侵沒軍喪衆干戈不息者邊將之憂也豈可虛
荷國寵而不稱其任哉故任益隆者負益重位益高者
責益深書稱無曠庶官詩有職思其憂此其義也陛下
體天真之淑聖登神機以繼統異聞康哉之歌偃武行
文之美而數年以來水旱不時民困衣食師徒之發歲
歲增調加東有覆敗之軍西有殪沒之將至使蚌蛤浮
翔於淮泗鰲鼉謹譁於林木臣每念之未嘗不輟食而
揮餐臨觴而搥腕矣昔漢文發代疑朝有變宋昌曰內

有朱虛東牟之親外有齊楚淮南琅邪此則磐石之宗
願王勿疑臣伏惟陛下遠覽姬文二虢之援中慮周成
召畢之輔下存宋昌磐石之固昔騏驥之於吳阪可謂
困矣及其伯樂相之孫鄒御之形體不勞而坐取千
里蓋伯樂善御馬明君善御臣伯樂馳千里明君致太
平誠任賢使明之效也若朝司惟良萬機內理武將行
師方難克弭陛下可得雍容都城何事勞動鑾駕暴露
於邊境哉臣聞羊質虎皮見草則悅見豺則戰忘其皮

之虎也今置將不良有似於此故語曰患爲之者不知

知之者不得爲也昔樂毅奔趙心不忘燕廉頗在楚思

爲趙將

原注史記樂毅亡走趙遺燕惠王書王復以樂毅子樂間爲昌國君而樂毅往來復通燕趙

以爲客卿廉頗奔魏楚陰使人迎之一爲楚將無功曰我思用趙人

臣生乎亂長乎軍

又數承教於武皇帝伏見行師用兵之要不必取孫吳而闇與之合竊揆之於心常願得一奉朝覲排金門蹈玉陛列有職之臣賜須臾之間使臣得一散所懷攄舒蘊積死不恨矣被鴻臚所下發士息書期會甚急又聞

豹尾已建戎軒驚駕陛下將復勞玉躬擾神思臣誠竦
息不遑寧處願得策馬執鞭首當塵露撮風后之奇接孫
吳之要追慕卜商起予左右效命先驅畢命輪轂雖無
大益冀有小補然天高聽遠情不上通徒獨望青雲而
拊心仰高天而歎息爾屈平曰國有驥而不知乘焉皇
皇而更索昔管蔡放誅周召作弼叔魚陷刑叔向在國
原注左氏傳晉邢侯與雍子爭鄙田久而無成士景伯
如楚叔魚攝理韓宣子命斷舊獄罪在雍子雍子納其
女于叔魚叔魚蔽罪邢侯邢侯怒殺叔魚與雍子于朝
宣子問其罪于叔向叔向曰三人同罪施生戮死可也

雍子自知其罪而賂以買直耐也需獄邢侯專殺其罪一也已惡而掠美為昏貪以敗官為墨殺人忌為賊夏書曰昏墨賊殺皋陶之刑也請從之乃施邢侯而尸雍子叔魚於市三監之釁臣自當之

二南之輔求必不遠華宗貴族藩王之中必有應斯之舉者故傳曰無周公之親不得行周公之事惟陛下少留意焉近者漢氏廣建藩王豐則連城數十約則饗食祖祭而已未若姬周之樹國五等之品制也若扶蘇之

諫始皇淳于越之難周青臣

原注史記始皇集問諸生四百六十餘人皆坑之咸

陽長子扶蘇諫曰天下初定遠方黔首未集諸生皆誦法孔子今上皆重法繩之臣恐天下不安始皇怒使扶

燕北監蒙恬於上郡始皇置酒咸陽宮僕射周青臣進頌曰陛下以諸侯為郡縣人人自安樂無戰爭之患傳之萬世自古不及陛下威德始皇悅博士齊人淳于越進曰臣聞殷周之王千餘歲封子弟功臣自為枝輔今陛下有海內而子弟為匹夫卒有田常六卿之臣無輔拂何以相救哉事不師古而能長久者非所聞也

今青臣又面諛重陛下之過非忠臣

可謂知時變矣夫能使天下傾耳注

目者當權者是矣故謀能移主威能懾下豪右執政不在親戚權之所在雖疏必重勢之所去雖親必輕蓋取

齊者田族非呂宗也分晉者趙魏非姬姓也

原注史記田常弑簡

公齊國之政皆歸田常卒常子與三晉通遂有齊國至太公和遷齊康公於海上周安王立田和為齊侯

晉昭公卒六卿強公室界韓趙魏復并范中行智氏周
威烈王命魏斯趙籍韓虔為諸侯其後遂滅晉而三分
其地連晉靜公為家人惟陛下察之苟吉專其位凶離其患者異

姓之臣也欲國之安祈家之貴存共其榮沒同其禍者
公族之臣也今反公族疏而異姓親臣竊惑焉聞孟子
曰君子窮則獨善其身達則兼善天下今臣與陛下踐
氷履炭登山浮澗寒溫燥濕高下共之豈得離陛下哉
不勝憤懣拜表陳情若有不合乞且藏之書府不便臧
棄臣死之後事或可思若有毫釐少挂聖意者乞出之

朝堂使夫博古之士糾臣表之不合義者如是則臣願足矣帝輒優文答報是時大發士息及取諸國士植以前諸國士息已見發其遺孤稚弱在者無幾而復被取乃上書曰臣聞古者聖君與日月齊其明四時等其信是以戮凶無重賞善無輕怒若驚霆喜若時雨恩不中絕教無二可以此臨朝則臣下知所死矣受任在萬里之外審主之所以受官必已之所以投命雖有構會之徒泊然不以爲懼者蓋明君臣相信之明效也昔章子爲

齊將人有告之反者威王曰不然左右曰王何以明之
王曰聞章子改葬死母彼尚不欺死父顧當叛生君乎此
君之信臣也昔管仲親射桓公後幽囚從魯檻車載使
少年挽而送齊管仲知桓公必用已懼魯之悔謂少年
曰吾為汝唱汝為和聲和聲宜走於是管仲唱之少年
走而和之日行數百里宿昔而至至則相齊此臣之信
君也臣初受封策書曰植受之青社封于東土以屏翰
皇家為魏藩輔而所得兵百五十人皆年在耳順或不

踰矩虎賁官騎及親事凡二百餘人正復不老皆使年壯備有不虞檢校乘城顧不足以自救况皆復耄耄罷曳乎而名為魏東藩使屏翰王室臣竊自羞矣就之諸國國有士子合不過五百人伏以為三軍益損不復賴此方外未定必當須辦者臣願將部曲倍道奔赴夫妻負襁子弟懷糧蹈鋒履刃以徇國難何但習業小兒哉愚誠以揮涕增河鼯鼠飲海於朝萬無損益於臣家計甚有廢損又臣士息前後三送兼人已竭惟尚有小兒

七八歲已上十六七已還三十餘人今部曲皆年耆卧
在牀席非糜不食眼不能視氣息裁屬者凡三十七人
疲瘵風靡疣盲耳聵者二十三人惟正須此小兒大者
可備宿衛雖不以禦寇粗可以警小盜小者未堪大使
為可使耘鋤穢草驅護鳥雀休候人則一事廢一日獵
則衆業散不親自經營則功不攝常自躬親不委下吏
而已陛下聖仁恩詔三至士子給國長不復發明詔之
下有若皦日保金石之恩必明神之信畫然自固如天

如地定習業者並復見送晦若晝晦悵然失圖伏以陛下既爵臣百寮之右居藩國之任為置卿士屋名為宮冢名為陵不使其危居獨立無異於凡庶若伯成欣於

野耕子仲樂於灌園

原注莊子堯治天下伯成子高立為諸侯堯授舜舜授禹伯成子高

辭為諸侯耕禹往見之則耕在野禹趨就下風而問焉子高曰昔堯治天下不賞而民勸不罰而民畏今則賞罰而民且不仁德自此衰刑自此起後世之亂自此始矣耕而不顧劉向列女傳楚王聞於陵子終賢欲以為相使使者持金百鎰往聘迎之於陵子終曰僕有箕箒之妾請入與計之即入謂其妻曰楚王欲以我為相遣使者持金百鎰來今日為相明日結駟連駟食方丈於前可乎妻曰夫子臧屨以力食非與物無治也左琴

右書樂在其中矣夫結駟連驂所安不過容膝食方丈
于前所甘不過一肉今以容膝之安一肉之味而懷楚
國之憂其可乎亂世多害竊恐先生之不保命也于蓬
是子終出謝使者而不許也遂相與逃而為人灌園蓬
戶茅牖原憲之宅也陋巷簞瓢顏子之居也臣才不見
效用常慨然執斯志焉若陛下聽臣悉還部曲罷官屬
省監官使解璽釋紱追伯成子仲之業營顏淵原憲之
事居子臧之廬宅延陵之室如此雖進無成功退有可
守身死之日猶松喬也然伏度國朝終未肯聽臣之若
是固當羈絆於世繩維繫於祿位懷屑屑之小憂執無

已之百念安得蕩然肆志逍遙於宇宙之外哉此願未
從陛下必欲崇親親篤骨肉潤白骨而榮枯木者惟遂
仁德以副前恩詔皆遂還之其年冬詔諸王朝六年正
月其二月以陳四縣封植為陳王邑三千五百植每欲
求別見獨談論及時政幸冀試用終不能得既還悵然
絕望時法制待藩國既自峻迫寮屬皆賈豎下才兵人
給其殘老大數不過二百人植又以前過事謹案又以
前過事復
減半通志同今復減半十一年中而三徙都常汲汲無

本陳志重事字

歡遂發疾卒時年四十一遺令薄葬初植登魚山臨東
阿喟然有歸焉之志遂營為墓子志嗣徙封濟北王景
初中詔曰陳思王昔雖有過失既克已慎行以補前闕
且自少至終篇籍不離於手誠難能也其收黃初中諸
奏植罪狀公卿已下議尚書中書秘書三府大鴻臚皆
削除之撰錄植前後所著賦頌詩銘雜論凡百餘篇副

藏内外子志嗣

原注植嘗為琴瑟調歌辭曰吁嗟此轉
蓬居此何獨然長去本根逝風昔無休

聞東西經七陌南北越九阡卒遇回風起吹我入雲間自
謂終天路忽焉下沉淵驚颺接我去故歸彼中田當南

而更北謂東而反西宕宕當何依忽亡而復存飄飄周
八澤連翩歷五山流轉無恒處誰知吾苦艱願為中林
草秋隨野火燭糜滅豈不痛願與枝葉連孫盛曰異
哉魏氏之封建也不度先王之典不思藩屏之術違敦
穆之風背維城之義漢初之封或權倖人主雖云不度
時勢然也魏氏諸侯廼同匹夫雖懲七國矯枉過也且
魏之代漢非積德之由風澤既微六合未一而凋剪枝
幹委權異族勢同瓠木危若巢幕不嗣忽諸非天喪也
五等之制萬世不易之典
六代興亡曹問論之詳矣

志字允恭植之孽子也少好

學以才行稱夷簡有大度兼善騎射植曰保家主也立
以為嗣後改封濟北王累增邑并前九百九十戶晉武
帝為中撫軍迎常道鄉公奐於鄴與志語自暮達旦甚

器之及篡代降鄆城縣公以志為樂平太守厯章武趙
郡遷散騎常侍國子博士帝常讀六代論問志曰卿先
王作耶對曰先王手澤皆在臣所而無此論臣聞諸父
兄乃臣族父罔所作也以先王文高名著託以傳不朽
爾帝曰朕固疑非卿先王筆美王之與珅珅自易別也
後遷祭酒及荀勗譖間齊王攸歸藩下太守議崇錫文
物博士秦秀等以為齊王宜內匡朝政不宜令歸藩志
恨其父睽閱于魏銜恨以沒感攸復被讒因愴然歎曰

安有如此之才如此之親不得樹本助化而遠出海隅
晉朝其殆乎奏議曰伏惟太司馬齊王當出藩東夏備
物盡禮同之二伯今陛下為聖君稷契為賢臣內有魯
衛之親外有齊晉之輔坐而守安此萬世之基也古之

夾輔王室同姓則周公其人也異姓則太公其人也皆

身在內五世反葬

原注史記太公封于營丘比及五世皆反葬于周君子曰樂樂其所自生

禮不忘其本古人有言曰狐死正丘首仁也

後雖五霸代興桓文譎主下有

請隧之僭上有九錫之禮

原注左氏傳晉侯朝王王饗醴命之宥請隧弗許曰王章

也未有代德而有二王亦叔父之所惡也
王命尹氏策命晉侯為侯伯周官九命作伯終於譖而

不正驗於尾大不掉豈與召公之歌常棣周詩之詠鴟
鶚同日論哉今聖朝創業之始始之不諒後事難工幹
植不彊枝葉不茂骨鯁不存皮膚不充自義黃以來豈
一姓之獨有欲結其心者當有磐石之固欲享萬世之
利者當與天下議之故天之聰明自我人之聰明秦魏
欲得擅其威而纔得沒其身
原注謂秦不封建子弟魏禁銅諸侯王也周漢
能分其利而親疎為之用此自聖主之深慮日月之所

照事雖淺謀之當深言雖輕思之宜重志備位儒臣若
言不及禮是志寇竊知忠不言義所不敢志以為當如
博士等議議當上以示從弟高邑公家嘉曰兄議甚切
必將見責然百年之後自有良史帝覽議大怒曰曹志
尚不明吾心況四海乎有司奏免志官以公還第頃之
復為散騎常侍遭母憂因毀瘠病卒謚曰定

熊早卒黃初二年追封謚蕭懷公太和三年又追進爵
為王青龍二年子哀王炳嗣食邑二千五百戶六年卒

無子國除

議曰予讀植求通親及陳情表與白馬王彪詩未嘗不為流涕也親親之情若此其篤也愛兄之道若此其盡也雖為操所愛不自矯飾終無徼冀使冢嗣不搖而甘處藩服及任城問璽毅然責以袁氏事則為弟之道亦盡也夫豈能興難而不銜之不置操死而身未冷削奪其爵趣使就國禁錮終身而族丁儀丁廙嗚呼仁人之於弟也不藏怒焉不宿怨焉親愛之而已矣不真寡恩

哉自是骨肉之禍興為晉之甲兵

原注晉書惠帝元康元年楚王瑋矯詔殺

汝南王亮賈后因殺瑋永康元年趙王倫誅賈后逼帝禪位永寧元年齊王冏討倫誅之太安元年長沙王又殺冏永興元年東海王越殺又討成都王穎幽之卒越復伐河間王顯南陽王模殺顯越尋以憂卒

宋之

鼎鑊

原注南史宋文帝殺其弟江夏王義康裴子野曰宋之鼎鑊吁可畏哉

齊之香火

原注

南史齊明帝忌高武子孫欲盡除之以問始安王遙先遙先以為當以次施行遙先有足疾上嘗令乘輿入每與上屏人久語上索香火鳴咽流涕明日必有所誅會上疾暴甚遙先遵行其策殺河東王鈐十王於是太祖世子祖及世宗諸子皆盡矣

隋之絞縊

原注隋書煬帝即位矯高祖唐之詔賜故太子勇死縊殺之

之弓矢

原注唐書太子建成齊王元吉至臨湖殿秦盡王世民射建成殺之尉遲敬德射元吉殺之

為管蔡之狠譎無復棠棣之兄弟皆不啟之也當太和之際司馬懿得政而天下望實歸之植即言取齊者田族非呂宗分晉者趙魏非姬姓而敵竟弗察嗟夫有一賢王而不用畀之區區之爽忍死待懿以託昏童而魏果亡植之識慮若此其志可哀已隋王通云陳思王可謂達理者也以天下讓時人莫之知也又曰君子哉思王也其文深以典可謂知植矣陳壽謂思王文才富艷足以自通後葉然不能遠防終至携隙楚則失之而齊

亦未為得豈知言哉

欽定四庫全書

續後漢書卷二十九下

元 郝經 撰

列傳第二十六下

曹操諸子

曹昂

豐愍王

曹鑠

相殤王

曹冲

鄧哀王

曹據

彭城王

曹宇

燕王

曹林

沛穆王

曹衮

中山恭王

曹玪

濟陽懷王

曹峻

陳留恭王

曹矩

范陽王

閔王

曹幹

趙王

曹子上

臨邑殤公

曹彪

楚王

曹子勤

剛殤公

曹

子乘

穀城殤公

曹子整

郿戴公

曹子京

靈殤公

曹均

樊安公

曹

子棘

廣宗
殤公

曹徽

東平
靈王

曹茂

樂陵
王

曹丕諸子

曹協

贊哀
王

曹芳

北海
悼王

曹鑒

東武陽
懷王

曹霖

東海
定王

曹禮

元城
哀王

曹邕

邯鄲
懷王

曹貢

清河
悼王

曹儼

廣平
哀王

曹操劉夫人生昂鑠環夫人生冲據宇杜夫人生林衮

秦夫人生玗峻尹夫人生矩王昭儀生幹孫姬生子上

彪子勤李姬生子乘子整子京周姬生均劉姬生子棘宋

姬生徽趙姬生茂凡二十一子

昂庶長也字子修弱冠舉孝廉隨操南征為張繡所殺
無子黃初二年追封諡曰豐悼公太和三年改昂諡曰
愍王嘉平六年以琬襲昂爵為豐王正元景元中累增
邑并前二千七百戶琬卒諡曰恭王子廉嗣

鑠早卒太和三年追封諡曰相殤王青龍元年子愍王
潛嗣其年卒二年子懷王偃嗣邑二千五百戶四年卒
無子國除正元二年以樂陵王茂子陽都鄉公竦繼鑠
後

冲字倉舒少聰察五六歲智意若成人孫權致巨象欲知其斤重羣下莫能對冲曰置象大船上刻其水痕所至稱物以載之則可知矣操大悅即施行焉

謹案異苑曰山雞愛

其毛羽映水則舞魏武時南方獻之帝欲其鳴舞而無由公子倉舒令置大鏡其前雞鑒形而舞不止遂之死

時軍國多事用刑嚴重操鞍革在庫而為鼠所齧庫吏懼必死欲面縛首罪猶懼不免冲謂之曰待三日中然後自歸於是以刀穿單衣如鼠齧者謬為失意貌有愁色操問之冲對曰世俗以為鼠齧衣者其主不吉令單

衣見齧是以憂戚操曰此妄言爾無所苦也俄而庫吏以齧鞍革聞操笑曰兜衣在側尚齧况鞍革縣柱乎一

無所問其識達皆此類也凡應罪戮而為冲所辨理賴

以濟宥者前後數十

原注魏書冲每見當刑者輒探覩其冤枉之情而微理之及勤勞之

吏以過誤觸罪常為太祖陳說宜寬宥之辨察仁愛與性俱生容貌姿美有殊于衆故特見寵異裴松之曰以容貌之美一類之言而分以為三亦叙屬之一病也操數對羣臣稱述有欲傳後

意年十三建安十三年疾病操親為請命及亡哀甚不

寬喻操操曰此我之不幸汝曹之幸也言則流涕

謹按陳思

王集有為聘甄氏亡女與合葬贈騎都尉印綬命宛侯
倉舒誅

據子琮奉冲後

原注孫盛曰春秋之義立嫡以長不以賢冲雖存也猶不宜立況其既沒而發

斯言乎詩云無易由言魏武其易之也

二十二年封琮為鄧侯黃初二年

追贈冲諡曰鄧哀侯又追加號為公策曰惟黃初二年

八月丙午皇帝曰咨爾鄧哀侯冲昔皇天鍾美於爾躬

俾聰哲之才成於弱年當永享顯祚克成厥終如何不

祿早世夭昏朕承天序享有四海並建親親以藩王室

惟爾不逮斯榮且葬禮未備追悼之懷愴然攸傷今遷

葬於高陵使使持節兼謁者僕射郎中陳承追賜號曰
鄧公祠以太牢魂而有靈休茲寵榮嗚呼哀哉三年進
琮爵徙封冠軍公四年徙封己氏公太和五年加冲號
曰鄧哀王景初元年琮坐于中尚方作禁物削戶三百
貶爵為都鄉侯復為己氏公正始七年轉封平陽公景
初正元景元中累增邑并前千九百戶

據建安十六年封范陽侯二十二年徙封宛侯黃初二
年進爵為公三年為章陵王其年徙封義陽王以南方

下濕又以環太妃彭城人徙封彭城又徙封濟陰五年
詔曰先王建國隨時而制漢祖增秦所置郡至光武以
天下損耗并省郡縣以今比之益不及焉其改封諸王
皆為縣王據改封定陶縣太和六年改封諸王皆以郡
為國據復封彭城景初元年據坐私遣人詣中尚方作
禁物璽書曰制詔彭城王有司奏王遣司馬董和齎珠
玉來到京師中尚方多作禁物交通工官出入近署踰
侈非度慢令違制繩王以法朕用愜然不寧於心王以

懿親之重處藩輔之位典籍日陳于前勤誦不輟于側
加雅素奉修恭肅敬慎務在蹈道孜孜不衰豈忘率意
正身考終厥行哉若然小疵或謬于細人忽不覺悟以
斯為失爾書云惟聖罔念作狂惟狂克念作聖古人垂
誥乃至于此故君子思心無斯須遠道焉常慮所以累
德者而去之則德明矣開心所以為塞者而通之則心
夷矣慎行所以為尤者而修之則行全矣三者王之所
能備也今詔有司宥王削縣二千戶以彰八柄與奪之

法昔義文作易著休復之戒仲尼論行既過能改王其
改行茂昭斯義率意無怠三年復所削戶邑正元景元
中累增邑并前四千六百戶

字字彭祖建安十六年封都鄉侯二十二年改封魯陽
侯黃初二年進爵為公三年為下邳王五年改封單父
縣太和六年改封燕王曹叡少與宇同止常愛異之及
立寵賜與諸王殊青龍三年徵入朝景初元年還鄴二
年夏復徵詣京都冬十二月叡疾篤拜宇為大將軍屬

以後事受署四日宇深固讓劉放等因譖間之獻意亦
變遂免宇官三年夏還鄴景初正元景元中累增邑并
五千五百戶常道鄉公奐宇之子入繼大宗

林建安十六年封饒陽侯二十二年徙封譙黃初二年
進爵為公三年為譙王五年改封譙縣七年徙封鄆城
太和六年改封沛景初正元景元中累增邑并前四千

七百戶卒諡曰穆子緯嗣

原注裴松之曰案嵇氏譜嵇康妻林子之女也

衮建安二十一年封平鄉侯少好學年十餘歲能屬文

善讀書文學左右恐損精力數諫止之不從二十二年徙封東鄉侯其年又改封贊侯黃初二年進爵為公官屬皆賀袞曰夫生深宮之中不知稼穡之艱難多驕逸之失諸賢既慶其休宜輔其闕每兄弟游娛袞獨覃思經典文學防輔相與言曰受詔察公舉錯有過當奏及有善亦宜以聞不可匿也遂共表稱陳袞美袞聞之大驚懼責讓文學曰脩身自守常人之行爾而諸君乃以上聞是適所以增其負累也且如有善何患不聞而遽

共如是是非益我者其誠慎如此三年為北海王其

年黃龍見鄴西漳水袞上書贊頌詔賜黃金十斤詔曰

昔唐叔歸禾東平獻頌

原注書唐叔得禾異畝同穎獻諸天子王命唐叔歸周公于東

作歸禾

後漢書明帝以所作光武本紀示東

平王蒼蒼因上光武受命中興頃帝甚善之斯皆骨肉

贊美以彰懿親王研精墳典耽味道真文雅煥炳朕甚

嘉之王其克慎明德以終令聞四年改封贊王七年徙

封濮陽太和二年就國尚約儉教勅妃妾紡績織紉習

為家人事五年冬入朝六年改封中山初袞來朝犯京

都禁青龍元年有司奏袞詔曰王素敬慎邂逅至此其以議親之典議之有司固執璽書曰制詔中山王有司奏王乃者來朝犯交通京師之禁朕惟親親之恩用寢吏議然法者所與天下共也不可得廢今削王縣二戶七百五十夫克已復禮聖人稱仁朝過夕改君子與之王其誠諸無貳咎也袞憂懼戒敕官屬愈謹叡嘉其意二年復所削縣三年秋袞得疾病詔遣太醫視疾殿中虎賁齋手詔賜珍膳相屬又遣太妃沛王林並就省疾

袞疾困敕令官屬曰吾寡德忝寵大命將盡吾既好儉而聖朝著終誥之制為天下法吾氣絕之日自殯及葬務奉詔書昔衛大夫蘧瑗葬濮陽吾望其墓常想其遺願托賢靈以弊髮齒營吾兆域必往從之禮男子不卒婦人之手亟以時成東堂堂成名之曰遂志之堂與疾往居之又令世子曰汝幼少未聞義方早為人君但知樂不知苦不知苦必將以驕奢為失汝宜接大臣務以禮雖非大臣猶宜答拜事兄以敬恤弟以慈兄弟有不

良之行當造膝諫之諫之不從流涕喻之喻之不改乃
白其母若猶不改當以奏聞并辭國土與其守寵罹禍
不若貧賤全身此亦謂大罪惡爾其微過細故當掩覆
之嗟爾小子慎脩乃身奉聖朝以忠貞事太妃以孝敬
閨闈之內奉令于太妃閭闔之外受教于沛王無怠乃
心以慰予靈其年卒諡曰恭詔沛王林留訖葬使大鴻
臚持節典護喪事宗正弔祭贈賵甚厚凡所著文章二
萬餘言才不及陳思王而好學與之作

謹按陳志無學
字此有學字較

明
晰子孚嗣景初正元景元中累增邑并前三千戶

珪建安十六年封西鄉侯早卒無子二十年以沛王林子贊襲珪爵邑早卒無子曹丕復以贊弟壹紹珪後黃初二年改封濟陽侯四年進爵為公太和四年追進珪爵諡曰懷公六年又進號曰懷王追諡贊曰西鄉哀侯壹卒諡曰悼公子恒嗣景初正元景元中累增邑并前千九百戶

峻字子安建安二十一年封郿侯二十二年徙封襄邑

黃初二年進爵為公三年為陳留王五年改封襄邑縣
太和六年又封陳留甘露四年卒諡曰恭子澳嗣景初
正元景元中累增邑并前四千七百戶

矩早卒無子建安二十二年以樊安公均子敏奉矩後
封臨晉侯黃初三年追封諡矩為范陽閔公五年改封
敏范陽王七年徙封句陽太和六年追進矩號曰范陽
閔王改封敏琅邪王景初正元景元中累增邑并前三
千四百戶敏卒諡曰原子焜嗣

幹建安二十年封高平亭侯二十二年徙封賴亭侯其
年改封弘農侯黃初二年進爵徙封燕公三年為河間
王五年改封樂城縣七年徙封鉅鹿太和六年改封趙
王幹本陳氏子幹生而陳氏卒王夫人有寵於操令母
幹五歲而操卒遺令丕曰此兒三歲亡母五歲失父以
累汝也且丕之立王夫人有力焉故親待隆於諸弟常
呼丕為阿翁丕曰我汝兄爾丕慙其意每為流涕原注裴松之曰
案此傳以母貴賤為次不計兄弟之年故楚王彪及丕
年雖大傳在幹後尋朱建平傳知彪大幹二十歲

臨卒復有遺詔屬叡丕卒是以叡常加恩意青龍二年
私通賓客為有司所奏賜幹璽書誠誨之曰易稱開國承家
小人勿用詩著大車維塵之誠自太祖受命創業深觀
治亂之源鑒存亡之機初封諸侯訓以恭慎之志言輔
以天下之端士常稱馬援之遺誠重諸侯賓客交通之
禁乃使與犯妖惡同夫豈以薄骨肉哉徒欲使子弟無
過失之愆士民無傷害之悔爾高祖踐阼祇慎萬機申
著諸侯不朝之令朕感詩人棠棣之作嘉采菽之義亦

緣詔文曰若有詔得詣京都故命諸王以朝聘之禮而
楚中山並犯交通之禁趙宗戴捷咸伏其辜近東平王
復使屬官歐壽張吏有司舉奏朕裁削縣令有司以曹
纂王喬等因九族時節集會王家或非其時皆違禁防
朕惟王幼少有恭順之素加受先帝顧命欲崇恩禮延
乎後嗣況近在王之身乎且自非聖人孰能無過已詔
有司宥王之失古人有言誠慎乎其所不覩恐懼乎其
所不聞莫見乎隱莫顯乎微故君子慎其獨也叔父茲

率先聖之典以纂乃先帝之遺命戰戰兢兢靖恭厥位
稱朕意焉景初正元景元中累增邑并前五千戶

子上早卒太和五年追封諡曰臨邑殤公無後

彪字朱虎建安二十一年封壽春侯黃初二年進爵徙

封汝陽公三年封弋陽王其年徙封吳王五年改封壽

春縣七年徙封白馬

謹案陳思王集贈白馬王彪詩序曰黃初四年正月白馬王任城王

與余俱朝京都會節氣到洛陽考曹植傳黃初四年徙封雍丘王其年朝雒陽注云任城王暴薨諸王既懷友于之痛植及白馬王彪還國欲同路東歸以叙隔濶之恩而監國使者不聽植發憤告離而作詩云云又考任城

王彰傳曰四年朝京都則朝京師在四年無疑志稱彪七年徙封白馬則四年尚為吳王矣而植詩作于四年臨行叙別題序俱稱白馬王必不誤也恐本傳徙封之年有誤耳

太和五年冬來朝六

年改封楚王初彪來朝犯禁元年

謹案此元年當是青龍元年通志云青龍

初為有司所奏

為有司所奏詔削縣三戶千五百二年大赦復

所削縣景初三年增戶五百并前三千戶嘉平元年充

州刺史令狐愚與太尉王凌謀迎立彪都許昌事覺凌

等皆死乃遣傳及侍御史就國案驗收治諸相連及者

廷尉請徵彪治罪於是依漢燕王旦故事使兼廷尉大

鴻臚持節賜彪璽書曰先王行賞不遺仇讎用戮不違親戚至公之義也故周公流涕而決二叔之罪孝武傷

懷而斷昭平之獄古今常典也

原注前漢書廣川王去所嬖姬昭信殺幸姬王昭

平及王所殺無辜十六人有司請誅王制曰朕不忍致王于法有司請廢勿王與妻子徙上庸奏可去道自殺

昭信素市惟王國之至親作藩于外不能祇奉王度表率宗

室而謀於奸邪乃與太尉王凌兗州刺史令狐愚構通

逆謀圖危社稷有悖忒之心無忠孝之意宗廟有靈王

何面目以見先帝朕深痛王自陷罪辜既得王情深用

憮然有司奏王當就大理朕惟公族甸師之義不忍肆
王市朝故遣使者賜書王自作孽匪由于他燕刺之事
宜足以觀王其自圖之彪乃自殺妃及諸子皆免為庶
人徙平原彪官屬及監國謁者坐知情無輔導義皆伏
誅國除為淮南郡正元元年詔曰故楚王彪背國附姦
身死嗣替雖自取之猶哀矜焉夫含垢藏疾親親之道
也其封彪世子嘉為常山真定王景元元年增邑并前
二千五百戶魏亡入晉封高邑公元康中與石崇俱為國

子博士後為東莞太守吏部郎李重啟曰魏氏宗室屈
滯聖恩每為存撫東莞太守曹嘉才幹學義不及志翕
而良素脩潔性業踰之又已歷二郡臣以為宜優先代

之後可以嘉為員外散騎侍郎從之

原注裴松之曰石崇為征虜將軍監

青徐軍事屯于下邳嘉以詩遺崇曰文武應時用兼才
在明哲嗟嗟我石生為國之俊傑入侍于皇闈出則登
九列威檢肅青徐風發宣吳裔疇昔謬同位情至過魯
衛分離踰十載思遠心增結願子鑒斯誠寒暑不踰契
崇答曰昔常接羽儀俱游青雲中訓道教胄于儒化渙
以融同聲無異響故使思愛隆豈惟敦初好歟分在今
終孔不陋九夷老氏適西戎逍遙滄海隅可以保王躬
世事非所務周公不足夢玄寂令神王是以守至冲

子勤早卒太和五年追封諡曰剛殤公無後

子乘早卒太和五年追封諡曰穀城殤公無後

子整奉從叔父郎中紹後建安二十二年封郿侯二十三年卒無子黃初二年追進爵諡曰戴公以彭城王據子範奉整後三年封平氏侯四年徙封成武太和三年進爵為公青龍三年卒諡曰悼公無後四年詔以範弟東安鄉公闡為郿公奉整後正元景元中累增邑并前千八百戶

子京早卒太和五年追封諡曰靈殤公無後

均奉叔父薊恭公彬後建安二十二年封樊侯二十四
年卒子抗嗣黃初二年追進公爵諡曰樊安公三年徙
封抗薊公四年徙封屯留公景初元年卒諡曰定公子
諡嗣景初正元景元中累增邑并前千九百戶

子棘早卒太和五年追封諡曰廣宗殤公無後

徽奉叔父朗陵哀侯玉後

謹案陳志作哀侯王疑
誤通志作玉與此合

建安

二十二年封歷城侯黃初二年進爵為公三年為廬江

王四年徙封壽張王五年改封壽張縣太和六年改封東平青龍二年徵使官屬過壽張縣吏為有司所奏詔削縣一戶五百其年復所削縣正始三年卒諡曰靈子翕嗣景初正元景元中累增邑并前三千四百戶魏亡入

晉封廩丘公魏宗室中名次鄆城公志

謹案曹植傳子志改封鄆城公

志注作至誤

泰始二年翕遣世子琨奉表來朝詔曰翕秉德

履道魏宗之良令琨遠至其假世子印綬加騎都尉賜朝服一具錢十萬隨才叙用翕撰解寒食散方與皇甫

謚所撰並行于世

茂建安二十二年封萬歲亭侯二十三年改封平輿侯
黃初三年進爵徙封乘氏公七年徙中丘茂性傲很少
無寵于操及丕立又獨不王太和元年徙封聊城公其
年為王詔曰昔象之為虐至甚而大舜猶侯之有庠近
漢氏淮南阜陵皆為亂臣逆子而猶或及身而復國或
至子而錫土有虞建之於上古漢文明章行之乎前代
斯皆敦叙親親之厚義也

原注漢書淮南厲王長文帝
時謀反遷于蜀而死帝憐淮

南王封子四人為列侯後漢書楚王英光武子明帝時謀反有司請誅之帝以親親不忍廢英徙丹陽涇縣英自殺章帝封英子五人皆為列侯阜陵王延聊城公謀反章帝詔貶爵為阜陵侯後復為阜陵王

茂少不閑禮教長不務善道先帝以為古之立諸侯也

皆命賢者故姬姓有未必侯者是以獨不王茂太皇太

后數以為言加聞茂頃來少知悔昔之非欲脩善將來

君子與其進不保其往也令

謹案今字陳志作合疑誤

封茂為聊城

王以慰太皇太后下流之念六年改封曲陽王正始三

年東平靈王卒茂稱嗌痛不肯發哀居處出入自若有

司奏除國土詔削縣一戶五百五年徙封樂陵詔以茂
祖奉少諸子多復所削戶又增戶七百嘉平正元景元

中累增邑并前五千戶

原注凡舊史闕卒者
不可考皆為闕文

曹丕甄后生叡李貴人生協潘淑媛生粦朱淑媛生鑒
仇昭儀生霖徐姬生禮蘇姬生邕張姬生貢宋姬生儼
凡九子

協早卒太和五年追封諡曰經殤公青龍二年更追改
號諡贊哀王三年子殤王尋嗣景初三年增戶五百并

前三千戶正始九年卒無子國除

蕤黃初七年曹叡立以蕤為陽平縣王太和六年改封
北海青龍元年卒諡曰悼二年以琅邪王子贊奉蕤後
封昌鄉公景初二年立為饒安王正始七年徙封文安
正元景元中累增邑并前三千五百戶

鑒黃初六年封東武陽王其年卒青龍三年賜諡曰懷
無子國除

霖黃初三年立為河東王六年改封館陶縣曹叡立以

不遺意愛寵霖異於諸國而霖性麤暴閨門之內婢妾之間多所殘害太和六年改封東海嘉平元年卒諡曰定子啓嗣景初正元景元中累增邑并前六千二百戶高貴鄉公髦霖之子也入繼太宗

禮黃初二年封秦公以京兆郡為國三年改為京兆王六年改封元城王太和三年卒諡曰哀五年以任城王楷子悌嗣禮後六年改封梁王景初正元景元中累增邑并前四千五百戶

邕黃初二年封淮南公以九江郡為國三年進為淮南王四年改封陳六年改封邯鄲太和三年卒諡曰懷五年以任城王楷子溫嗣邕後六年改封魯陽景初正元景元中累增邑并前四千四百戶

貢黃初三年封清河王四年卒諡曰悼無子國除儼黃初三年封廣平王四年卒諡曰哀無子國除

議曰魏氏封建皆寄地空名而無其實國有老兵百餘以為守衛縣隔千里之外無朝聘之禮會同之制游獵

不得過三十里設防輔監國之官以伺察之禁衛嚴固
同於圉圉位號靡定大小歲易有王公之號乃儕於匹
夫皆思為布衣而不得正始中曹爽輔政族人曹罔上
書曰昔夏殷周之歷世數十而秦二世而亡何則三代
之君與天下共其民故天下同其憂秦王獨制其民故
傾危而莫救夫與人共其樂者人必憂其憂與人同其
安者人必拯其危先王知獨治之不能久也故與人共
治之知獨守之不能固也故與人共守之兼親疏而兩

用參同異而並進是以輕重足以相鎮親疎足以相衛

并兼路塞逆節不生及其衰也桓文帥禮苞茅不貢齊

師伐楚宋不城周晉戮其宰

原注左氏傳晉魏舒合諸侯之大夫子翟泉將以城

成周宋仲幾不受功乃執仲幾歸于京師

王綱弛而復張諸侯傲而復肅二

霸之後寢以陵遲吳楚馮江負固方城雖心希九鼎而

畏迫宗姬奸情散於胸懷逆謀消於唇吻斯豈非信重

親戚任用賢能枝葉碩茂本根賴之與自此之後轉相

攻伐兵并於越晉分為三魯滅於楚鄭兼於韓豎乎戰

國諸姬微矣惟燕魏獨存然皆弱小西迫彊秦南畏齊
楚救於滅亡匪遑相卹至於王赧降為庶人猶枝幹相
持得居虛位海內無主四十餘年秦據勢勝之地騁譎
詐之術征伐關東蠶食九國至於始皇乃定天位曠日
若彼用力若此豈非深根固蒂不拔之道乎易曰其亡
其亡繫于苞桑周德其可謂當之矣秦觀周之弊以為
以弱見奪於是廢五等之爵立郡縣之官棄禮樂之教
任苛刻之政子弟無尺寸之封功臣無立錐之土內無

宗子以自毗輔外無諸侯以為藩衛仁心不加於親戚
惠澤不流於枝葉譬猶芟刈股肱獨任胸腹浮舟江海
捐棄楫櫂觀者為之寒心而始皇晏然自以為關中之
固金城千里子孫帝王萬世之業也豈不悖哉是時淳
于越諫曰臣聞殷周之王封子弟功臣十有餘歲今陛
下君有四海內而子弟為匹夫卒有田常六卿之臣而
無輔弼何以相救事不師古而能長久者非所聞也始
皇聽李斯偏說而絀其議至身死之日無所寄付委天

下之重於凡夫之手託廢立之命於奸臣之口至今趙
高之徒誅鋤宗室胡亥少習刻薄之教長遵凶父之業
不能改制易法寵任兄弟而乃師謨申商諮謀趙高自
幽深宮委政讒賊身殘望夷求為黔首豈可得哉遂乃
郡國離心衆庶潰敗勝廣唱之於前劉項斃之於後向
使始皇納淳于之策抑李斯之論割裂州郡分王子弟
封三代之後報功臣之勞土有常君民有定主枝葉相
扶首尾為用雖使子弟有失道之行時人無湯武之賢

奸謀未發而身已屠戮何區區之陳項而復得措其手
足哉故漢祖奮三尺之劍驅烏集之衆五年之中而成
帝業自開闢以來其興功立勲未有若漢祖之易者也
夫伐深根者難為功摧枯朽者易為力理勢然也漢鑒
秦之失封植子弟及諸呂擅權圖危劉氏而天下所以
不能傾動百姓所以不易心者徒以諸侯彊大磐石膠
固東牟朱虛受命於內齊代吳楚作衛於外故也向使
高祖踵亡秦之法忽先王之制則天下已傳非劉氏有

也然高祖封建地過古制大者跨州兼域小者連城數十上下無別權侔京室故有吳楚七國之患賈誼曰諸侯彊盛長亂起奸夫欲天下之治安莫若衆建諸侯而少其力令海內之勢若身之使臂臂之使指則下無背叛之心上無誅伐之事文帝不從至於孝景猥用晁錯之計削絀諸侯親者怨恨疎者震恐吳楚唱謀五國從風兆發高祖釁成文景由寬之過制急之不漸故也所謂末大必折尾大難掉尾同於體猶或不從況乎非體

之尾其可掉哉武帝從主父之策下推恩之命自是之

後齊分為七

原注謂齊城陽濟北濟南淄川膠西膠東也

趙分為六

原注謂趙平原

真定中山廣川河間也

淮南三割

原注謂淮南衡山廬江也

梁代五分

原注謂梁濟川

濟東山陽濟陰也代未嘗分此言五分未詳

遂以陵遲子孫微弱衣食租稅

不豫政事或以酎金免削或以無後國除至於成帝王

氏擅朝劉向諫曰臣聞公族者國之枝葉枝葉落則本

根無所庇蔭方今同姓疏遠母黨專政排擯宗室孤弱

公族非所以保守社稷安固國嗣也其言深切多所稱

引成帝雖悲傷嘆息而不能用至于哀平異姓秉權假
周公之事而為田常之亂高拱而竊天位一朝而臣四
海漢宗室王侯解印綬貢奉社稷猶懼不得為臣妾
或乃為之符命頌莽恩德豈不哀哉由斯言之非宗子
獨忠孝於惠文之間而叛逆於哀平之際也徒以權輕
勢弱不能有定爾賴光武皇帝挺不世之資禽王莽於
已成紹漢祀於既絕斯豈非宗子之力邪而曾不鑒秦
之失策襲周之舊制踵亡國之法而僥倖無疆之期至

於桓靈閭豎執衡朝無死難之臣外無同憂之國君孤
立於上臣弄權於下本末不能相御身手不能相使由
是天下鼎沸奸凶並爭宗廟焚為灰燼宮室變為秦藪
居九州之地而身無所安處悲夫魏太祖武皇帝躬聖
明之資兼神武之畧恥王綱之廢絕愍漢室之傾覆龍
飛譙沛鳳翔兗豫掃除凶逆剪滅鯨鯢迎帝西京定都
潁邑德動天地義感人神漢氏奉天禪位大魏大魏之
興于今二十有四年矣觀五代之存亡而不用其長策

觀前車之傾覆而不改其轍迹子弟王空虛之地君有不使之民宗室竄於閭閻不聞邦國之政權均匹夫執齊凡庶內無深根不拔之固外無磐石宗盟之助非所以安社稷為萬代之業也且今之州牧郡守古之方伯諸侯皆跨有千里之士兼軍武之任或比國數人或兄弟並據而宗室子弟曾無一人間廁其間相與維持非所以彊榦弱枝備萬一之慮也今之用賢或超為名都之主或為偏師之帥而宗室有文者必限以小縣之宰

有武者必置於百人之上使夫廉高之士畢志於衡軌
之內才能之人恥與非類為伍非所以勸進賢能褒異
宗族之禮也夫泉竭則流涸根朽則葉枯枝繁者蔭根
條落者本孤故語曰百足之蟲至死而不僵扶之者衆
也此言雖小可以譬大且墉基不可倉卒而成威名不
可一朝而立皆為之有漸建之有素譬之種樹久則深
固其根本茂盛其枝葉若造次徙於深山之中植於宮
闕之下雖壅之以黑墳暖之以春日猶不救於枯槁何

暇繁育哉夫樹猶親戚土猶士民建置不久則輕下慢
上平居猶懼其離叛危急將如之何是以聖王安而不
逸以慮危也存而設備以懼亡也故疾風卒至而無摧

拔之憂天下有變而無傾危之患矣冀以是感悟爽爽

不能用

原注魏氏春秋同中常侍兄叔興之後少帝族祖也是時天子幼稚同冀此論感悟曹爽爽不

納同之歸美封建欲曹爽脩德而固宗予以彊本幹同
姓之卿義所當言亦云忠矣然非三代而下救弊之道
也天生烝民惟德是從德大則從之者衆德小則從之

者寡故土有廣狹國有大小其君長則有尊有卑於是乎有諸侯其德極大其國極廣其位極尊於是乎有王者往也言天下從其德而歸往之也此生民之初列國之原也於是乎有王有侯有天下有列國不待封建而自成封建上古茫昧其制不可考唐虞之世禹平水土井地授民別為九州制為五服爵為五等內有百揆四岳外有州牧侯伯相為綱維封建之制始見于是及禹會諸侯于塗山執玉帛者萬國則其德之大歸往者

衆至于萬國則其土不能大其民不能衆不能叛而不
王為禍于天下也殷周之始歸者三千會者八百其國
漸大其民漸衆王德有盛衰而諸侯有叛有服於是乎
有昆吾有大彭有豷韋始違夫先王之制矣周公相成
王制禮作樂大明六代之制而折諸中幅員萬里列為
千八百國大者不過百里小者止五十里至于附庸又
不能五十里則國不能大民不能衆亦不能叛而不王
為禍於天下也故古之封建之弊禹能革之夏后氏封

建之弊而商能革之商人封建之弊而周能革之故其
制得而不弊夏商享國五六百年而周至七八百年周
德下衰王綱不振齊楚秦晉始大彊凌弱衆暴寡以力
不以德始有兼并之國大者至數圻小者亦數百里五
伯迭興更為長雄自千八百國并而為百二十國見於
春秋者七十餘國與會盟行霸令要結行私相與脰髀
彊大者十二焉厥後周分為二國析為七秦人遂廢井
田開阡陌始有兼并之家白圭輩以鄰國為壑畎澮不

復距川毀車崇卒而戎馬橫驚于天下各築長城以為藩籬先王疆理於是大壞楚滅諸侯謂之縣秦并諸侯謂之郡始皇兼六國并天下置三十六郡不復封建故封建之制始于古之自然而備于周之法制馴致而然也其壞始於諸侯之吞滅極于秦人之兼并無所救其弊者卒為郡縣而不復封建亦馴致而然也秦漢而下非郡縣之制得封建之制失也畎澮既失阡陌既開井田既壞兼并之家既成禮樂之治不興苟且之政既行

放僻之俗難易修之於數千載之際壞之於數百年之間一日欲復之難矣苟慕名而不覈其實不知救弊之道未有不禍天下者秦人謂周封建而亡郡縣天下骨肉為庶而亡於羣盜漢謂秦不封建而亡故大封同姓遂成七國懲羹吹壺分封劇邑亦以孤危竊于外戚魏人疏忌骨肉王以空名實同禁錮盜于彊臣晉以魏之失國勢與秦同依放漢初大封諸王八王之禍慘於七國社稷傾危劇于秦魏封建亦亡名而無實一弊未已

一弊復生然則何為而可治安既久民物漸復定經界
畫井田興禮樂一法制然後郡縣可除封建可復世無
百年之治人無百年之人有君而無臣有臣而無君朝
釋耒耜暮尋干戈救死扶傷之不暇焉能為三代之制
乎終亦苟且而已苟或願治因時救弊三代之制不可
復也郡縣之制不可廢也封同姓如周制其地別其國
其民自為郡縣親且賢焉任之以政如周召晉鄭可也
不賢焉如舜之有庠使食其征可也分其土而不分其

民分其賦而不分其權則親親尊尊任賢使能之道兩得焉親王自為同姓諸侯守令自為異姓諸侯不封建而得封建之實姑以匡維末俗而已謂封建而廢郡縣未可也郡縣而不封建亦未可也

贊曰鄴臺尚辭揆章摘藻惜惜王風一變至道陳思雄敏矢口曰藁鏗鉤傑韻磊落竒寶仲雍克讓周公多才猜阻禁錮嘯歌興哀陰殿古月荒庭綠苔應劉初喪彪彰弗來拜表通親再三弗允骨肉深阻涕泗橫隕忍人

不悌惡木露本三十二王曾如弗生幽閉天殛寃聲四
騰鳩居鵲巢卒斬國步葛藟興刺滅亡弗悟